


MUGONÈSYO

 . . . mu mmilo gwāngu ukufuma mwīngi, amabubōmbelo kalongo na mahano panja mu Arizona. Twāli na kabalilo akanunu. U Ntwa Yeso itolo atusayile uswe ukukindilila, nubwingi. ABēne bāgelile ukubōmba itolo akayabo panini aka lutēndeko lwa Ntwa, une ngusūbila iki, iyo yibagile ukuya njila indalusye ukukibika ikyēne, ukubūka nkati nu kōkya-ukusyūngutila u buyo bula, tāsī. Une nābūkile nkati amasiku mīngipo pankyēni pa kabalilo, nāli ni ndumbililo kalongo pamo kalongo na ibili ku fyōsa ifipānga ifinywāmu mōsa mu Phoenix, Sunnyslope na Tempe na Mesa kangī ukusuluka ukukīnda kula, kangī nduko-lumo ukōkya-ukusyūngutila ikyēne mōsa ukusyūngutila kangī polelo nālongolile ikyēne ku kilo ihano isya lukomano-lukulumba. Kangī ulwēne lwāli lukomano-lukulumba ulunywāmu ukukīnda uswe tuyīlēmo nalo mu America Kululu. Ulwēne lwāli lunywāmu lula. Ifyakulēmbukila ifinywāmu ukukīnda, kangī—kangī fyōpe i—i fyākulya-fyamayolo ikilo kila.

² Une ndinkutoligwa ukuyoba balinga ikyēne kyāli bala bālyāmbilīle u Mbepo Mwikemo. Ukwene kwāli—ukwene kwāli kwakuswīgīsa balinga balyāmbilīle u Mbepo Mwikemo, kangī balinga babumbulusīgwe kangī—kangī bāpokīgwe, ikyēne—ikyēne kyo itolo kinunu. Polelo uswe tukupalīsa kwa Kyala bo uswe tukukēta akabalilo kakusegelela. Bīngi anyāmbala abakulumba bālisile mula. Yumo mwa i . . .

³ Iki kisakubōmbāga Nkundwe Neville ikilūndiko kya finunu. Une nālimbwēne u ndumbilili gwa kiPresbeteri, ukufuma ku i Kōleji ya Presbeteri ingulumba ukukīnda mu i . . . nkīsi iki, ikumoga mwa Mbepo. O, mwe, ikyene kyāli naloliloli kindukimo, umwene ālyambilīle u Mbepo Mwikemo. Kangī polelo umwene ālimbulile une, umwene alinkuti, “Une ndinayo yimo mwa matepi gako.” Alinkuti, “Iyene yikāli nnunu fiyo mma.” Alinkuti, “Iyene itolo mu luko lumo yikunyelanyela, loli,” alinkuti, “Une nāyēgīle iyene mulamula mu koleji yangu nukuyikīna iyene.” Kangī alinkuti . . . Ukuya nnyambala unkulumba ugwa bufūndaminogono pala, umwene ākyungile abene bosa kimyemye. “Ena, abene balinkufika pa kupilika Ilyene kamokene, mulimosa,” umwene alinkuti. Kangī umwene alinkuti umwene āli . . .

⁴ Kangī alinkuti umwēne alinkufika ku kumoga mwa Mbepo ku kipanga kyāke, bo afumile umwēne pakwāmbilīla u Mbepo Mwikemo, kangī abene balinkuti, “Ntimi, mo ndili ugwe kuyaga pakumanyila ilikato ilipya?”

⁵ Umwene alinkuti, “Akabalilo kako ikilundilo kyangu kikumanyila kimo iki.” Nālīnogwīne kila kyāli nalōli kimogi, umwe mumenye, ubufyūkilo bwa kiPresbeteri, ena, alinkuti, “Akabalilo kāko ikilūndilo kikumanyila kimo iki.” Polelo ikyo kyo kindu kinunu. Itolo bo yo mwāna unnini, itolo mpya kangi pōpe umwene afumile pakuya. . . Ena, ugwe umenye iki umwene abagisenie ukuya, ukuya pulofesa gwa bufundaminogono mu Koleji ingulumba-fiyo ya kiPresbeteri mu Boston, mulimōsa, ikyēne kyo mu United States.

⁶ Une nālīmbwēne yumo mwa bapānji bakulumba ba bandūmbula ba Mayo ikulūmbilila i Nongwainunu mwa Mbepo nakyuoba mu ndimi. O, mwe! Une numbwene u mmang’anyi uyungi, uyu yo aali gwa Seventh-day Adventon, panja pa. . . Umwēne āli u—u—u mmang’anyi pa ndūmbula nu mmilo gōpe, kangi umwene, u nnyambala unkangale, ālyambilīle u losyo lwa Mbepo Mwikemo. Umwēne ālyāmbilīle Ikyēne. Ikilo kimo une nabīkīle amaboko pa mwēne kula ku bulongelonongwa, kangi umwēne ālyāmbilīle u Mbepo Mwikemo. Polelo uswe tuli. . . itolo ifindu fingi fiyo ifi u Ntwa ābombile ifi uswe tukupalisya, kangi fiyofiyō tukukéta pa kabalilo aka.

⁷ Polelo une ndinkuyoba ku bene, “Ngimba umwe mukusyagania yo salanki iyi akabalilo kako umfunde ungonatulo ikwanda ukusūma a mafuta?” Akene kāli kabalilo kako u Nnyambala ālisīle, kangi a bandu, abatendekesigwe bala bābukile nkati. O, une nhobwike fiyo ukumanya ukuti uswe tuliko nu bumi apa mmasiku ga bumalikisyo aga. Muketile? Une ngwītīka ukuti uswe tukwītūgāla mu tumo twa tubalilo utukulumba ukukīnda utu ikīsu kimēnyemo siku, itolo pa lugēne lwa Kwisa kwa Ntwa. Ngimba ikyo kikaya kinyafu? Inogona, ukuti kifuki akabalilo kalikosa lilino, i Lisimbo lyōsa ili itolo kifuki lifwanikisīgwe! Kangi popāpo uswe tukugūlila Umwēne pa kabalilo kalikōsa. Kangi uswe tukufimbilisigwa ukwītūgala pāsi pa luko lwa bugūlilo, ukuti, itolo akabalilo kalikosa ikyene kibagile ukuboneka. Yaga mwiputano mōsa, mwitendekisye!

⁸ Pa bumo bwa bwāngāle umwīsyūgu, une, yumo, une nālyāgēne nu ntumigwa ukufuma ku Formosa, unkīkūlu unkifu, ifyīnja malongo-mahano-na-mabili-na-fitatu mbukusi, kangi ikukīnda pa kifuki malongo-mana-na-fihano. Kangi umwene akali u—u Ndindwana, kangi abagile ukuti āfumile pakuya ndindwana unkeke ummogi. Kangi umwene alinkuti umwene akusigwe mu kaya ka Kikristi kuko “ena” āsanusyaga ena, kangi “umma” āsanusigwa umma. Kangi umwēne ākusigwe pāsi pa bumanyisigwe ubukali bula. Kangi umwene alinkuti, “Nkundwe Branham, pa bukusi ya kufwana, o,” alinkuti, “kifuki fyinja lwele mbukusi, une ndinkwinogona ukuti une naapele u bumi bwangu kwa Ntwa Yeso.” Umwene alinkuti, “Kifuki ifyinja kalongo na fibili mbukusi, une nasōngigwe nu ndumbilili gwa

kipanga-kipāgūke yumo, ukuti une ngufimbilisigwa ukwēga ulusayo lwakibili,” kangi alinkuti, “kangi nāli nubunyali nāsyōbīgwe mu kyēne.” Lōli umwēne alinkuti, “Kifuki fyinja kalongo na fihano na fibili mbukusi, une naloliloli nālyāmbilile Mbepo Mwikemo.” Kangi umwene agomokile apa lilino ikugela ukusumusya bamo mwa fipanga ifigonatulo ifya Baptisti ifi. Umwene alinkuti linga—linga kyalipo kilikosa aka umwene ākibwene “kifwile,” umwene yo Baptisti mwene, umwēne alinkuti, “fyo ifi ififwāno ifipānga fya Baptisti ukugomokela kuno.” Umwēne āfikōlile ifyēne “mōchale.”

⁹ Une ndinkuti, “Ena, une ngusakikisya akabalilo kāko ugwe uli pankyēni pa bwite . . .” Une ngwinogona lilino umwene yo . . . Inogona itolo, une, ndi malongo-mahano-na-fibili, umwene aali panja ukuya ntumigwa bo ngāli une ukupāpīgwa. Kangi polelo une ngwīnogōna une nafikaga ukuya nkāngāle fiyo ukubūka nkibānja. Kangi une ngwinogona, “Mwe, nswaga une, Ntwa.”

¹⁰ Kangi umwēne, nnuu, itolo ukuya mmulike kangi gwamahala bo mūmo umwēne ābagile ukuya. Kangi polelo ikumbula une ifyakumbonekela mula mu nsebwe, kangi mūmo fikuti i Nongwainunu yafūmbwigwāga mu Formosa kangi—kangi China, kangi Japan, na fyōsa bo ifyo. Polelo abene balinkuntuma umwene ukugomokela ukufuma mu ngunda, alinkuti, “Ugwe ukabagila ukwingila mu ngunda ukufuma pāpo ugwe ukīndile malongo-mahano-na-mabili, ugwe umenye.” Polelo abene balinkuntuma umwene ukugomokela. Lōli umwēne atisakuyaga kinūnu, umwēne ikubūka bo syōsa ingomano-ngulumba sya Baptisti isi. Kangi umwene alinkuti, “Billy Graham,” alinkuti, “mūmo umwēne aapīmbilaga indumi ya Baptisti, umwēne āli kyakumeleligwa ku kipānga kya Baptisti.” Alinkuti, “Umwene atikubegela abene kubutali ukufwana ukuti bēge Mbepo Mwikemo,” umwene alinkuyoba. O, kalumbu, ugwe itugala itolo na ikyo. Ikyo kyo kyōsa kotalusya. Umwēne alinkuyoba, bala a baChina kunyuma kula, alinkuti umwēne akābagile ukubaleka abēne babūkēge mula nukuyoba, “Uswe tukwitika Yeso Kristi.” Alinkuti, “Ikyo kyāli kinunu mōsa,” lōli alinkuti umwēne ābapelāga abēne basyāle pala mpaka ikindukimo kyābonīke, kangi polelo abēne bisaga ukuya Bakristi bānalōli.

¹¹ Une ndinkuti, “Iyo yo njila ikyene kikubūkila, kalumbu. Itolo babūla abēne, unko abēne basyāle mpaka ikindukimo kikuboneka.”

¹² Bule linga abatumigwa angali bayobile, lilino, ukufuma pa masiku lwele na limo, “Uswe tukwitika ukuti uswe tulinakyo Ikyene, muketile, unko uswe itolo twitikisye Ikyēne ukwisila mu lwītiko nukukīndilila ni mbombo yītu”? Muketile, ikyēne āngāli kikabōmbāmo siku. Abene bāgūlile kula mpaka abene bāmenye ukuti i kindukimo kyābonike. Kangi ulo

lo lutamio lwa uswe luli umwisyugu, uswe tutikusyala nu butali fiyo. Ena, iyo yo nongwa ukufuma apo uswe tubagile itolo ukwitugala uluko lulilōsa lwa būmi, ukubōmba kalikōsa, komma ukututamia uswe, panongwa yakuti uswe tutikusyala pala akatali kakufwāna'mma. Umwisyugu uswe tuli muno, kilabo uswe tusōkile, kang'i injila *iyi* kang'i injila *yila*. Linga uswe tukusyāla nubutali bwākufwāna mpaka ugwe kwīngila nkati kang'i kwīgāla ikifigo kunyuma kwa ugwe, ugwe kuyaga pakusyāla pala polelo. Umwe mufūngigwe mpaka ilisiku lwa kutabuligwa kwīnu. Une nsangalwike fiyo ifya ikyo.

¹³ Kang'i uswe twāli na kabalilo akakulumba, mūmo une njōbīle, ku Phoenix kang'i ukukīnda nkikoga na bīngi ba Bakristi kula, bīngi ba abene bikwibanilila nu bumi ubupala.

¹⁴ Une nābūkīle kula ku Kyāmba Kwītōngo, nkasi kunyuma kula, na une. Ilisiku limo akabalilo kākō, abīnāngu, unnuguna gwāngu, Doc, ākyūngile abalīndwāna babili, kang'i—kang'i Nkundwe na Kalumbu Wood ākyūngile u ndumiana, kang'i une nu nkasi gwāngu twāli nu mwēsi-gwa-bwēhe gwakibili. Kang'i umwēne alinkuti, “Bill, ugwe umenye, ugu gwāli mwēsi-gwa-bwēhe ukukīnda ugwākūwānda gula.” Umwēne alinkuti, “Akabalilo kakūwānda uswe twābūkīle ku mwēsi-gwa-bwēhe, ikindu kyene iki une nābombīle kwāli ukwitugasya ku bugonelo nukugūlila ukuti ugwe gwīse ukufuma ku bufwimi,” umwene alinkuti.

¹⁵ Une nāli mu luko lumo bukomu ubunini, umwe mumenye. Une ndinkwinogona, “Ena, lilino, une ngaya nayo i hela nyingi fiyo.” Nāpayile mōsa mu kakopo ka bufu bwakwēngela, isyakufwāna ukubūka pa bwēndelo bwa bufwīmi, kang'i pōpe une nāyaga pakuya mmwēgi akabalilo kākugwīsyā-māni kala. Polelo une ndinkwinogona, “Kipelaga itolo ikyene kyosa palikimo,” umwe mumenye. Kang'i—kang'i akabalilo kōsa une nāyaga pa bwēndelo bwa kufwīma, ubwēne bwāyaga mwēsi-gwa-bwēhe, umwe mumenye, kang'i popāpo uswe twālyōngēne. Loli akabalilo aka uswe twahombile pa kene kang'i naloliloli twasookile pānja, kang'i, fiki, twāli na kabalilo akakulumba.

¹⁶ Kang'i bīngi ba bēne bālisile ukufuma ku kipānga apa. Une ngusūbīla Nkundwe Sothmann, inyumba yāke yili kunyuma kula, kang'i Nkundwe Tom Simpson na bala, kang'i Nkundwe Maguire, kang'i uswe twesa twāli na kabalilo akakulumba mwa Ntwa.

¹⁷ Kang'i popāpo uswe tulinkubūka kula Kyāmba Kwītōngo, iki kyo itolo kwītōngo kwa Phoenix, kang'i ukusumuka mmwanya ukufuma ku bwīkolānie bula. Uu! U bwīkolānie nkāya akamwīsyūgu! Fyōbēne akabalilo kākō abāndu bikwānda ukubāla pa kīsu, ubutulwanongwa, kang'i ubugāsi bukwīsamō nkati. Kang'i une ndinkuketa mmwanya pala, kang'i nitugesye kubutali fiyo ukuti uswe twabagile ukuketaga ulukubo lwa

Phoenix, une ndinkuyoba ku nkasi, “Nguswiga utubalilo twingi bule, ukufuma papo uswe twitugesye muno mmaminiti kalongo na mahano aga, ukuti i Ngamu ya Ntwa yikwegigwa paitolo nkaya kala?” Hmm?

¹⁸ Kifuki, mulimōsa, mu buyo bwa kāya-akakulumba, ukwēga nkati Tempe kangi—kangi Sunnyslope, nu kukukinda kula, une ngusakikisya baliko kulakula ku bāndu maelifu-elifu mu kikoga kila. Une ndinkuyoba, “Ifiyinja bamia batatu ifi fikindile kukāliko nakimo lōli ifiyinjamiſwa na bakāmbwe nkati muno. Kangi ikyene lumo, mbuketelo bwa Ntwa, ikyene āngali kikuyaga kinunu linga ikyene kyāli kyakugomokela bo lula.” Uko ko kotalusya. Palema nalinga akāya akakulumba—akakulumba aka abēne bayēngile kula, kangi utwāga utumogi na fyōsa bo ifyo, fyo fimogi. Loli ikyene āngali kikuyaga kinunu, ikyene āngali kikuyaga kinunu mosa linga u nnyambala na bakikulu bendaga ukufyuka nu kugomoka mu ngindi na maboko gābo mmwanya mu mbepo, bikuntūfyā Kyala nukumpālisya Umwēne. Lōli, mbuyo bwa kila, ikyene kyo kuguna, ukwendendeka nkyēni, ukunwa. Itolo ukuleka ubwīgufu ukwīsa nkati, kangi ububībi buli kula.

¹⁹ Une ndinkuti, “Bo bulogwe bulīnga bwāsulwīgwe amayolo ga mmayolo, ikilo kya mmayolo nkāya aka! Bālinga bāli bānwe! Ngimba utwāya tulinga. . . Fyo filinga—filinga ifindu ififuluganikane fyābōmbigwe mu sala yabumalikisyo, nkāya akakulumba aka!”

²⁰ Kangi unkasi alinkuyoba kwa une, umwene alinkuyoba polelo ikindukimo bo iki, bo une ngwinogona, “Ngimba yikuyaga mbombonki iya kwīsa kuno polelo? Nongwa yafiki ugwe kulekaga akāya ukwīsa pānja kuno?”

²¹ Polelo une ndinkuti, “Apo po kilipo iki ikyene kili. Ukufuma pa fyōsa ifyo, iki naloliloli kyo kili mbwīngi, lōli balimo abānini abanāndi ukusuluka mula. Mīputo malinga amasūbiligwa gābūkile mmwanya mu mayolo aga gakindile ukusuluka kula, itolo ukwīsa pamwanya ku bubōmbelo?”

²² Kangi Umwēne āli nnuu fiyo kwa uswe mpaka ifipānga āngali fikwīsula mōsa bo likāli ilisuba ukwīngila, mpaka ugwe gwabagile ukufika ndubīngilo ukusyūngutula ubuyo. Kangi ifipānganio fila na fyosa bo ifyo, kangi u Ntwa alinkonelela panja u Mbepo Gwake nukubasaya abene. Kangi une nasiku nalekileko imibuli giligyōsa, ngūmilisya ukung’apa kulakula ku Nongwainunu. Kangi utubalilo tumo, ena, ikyene kyo magengelema fiyo, loli ikyene yo njila yene iyi une nkimenye ikyene. Ikyene kyo magengelema nkati muno. Polelo ikyene kikuyaga kyāmagēngelemiāpo ku Bulongi kūko uswe tukufimbilisigwa ukwima ku kyene. Popāpo, mosa, ikyene kyāli kindu kyalwimiko. Kangi uswe tukulōnda ukupālisya ikipānga

apa panongwa ya kwĩpũta nukukolelèla nkyēne kwa uswe, nu—nu kutukyũnga uswe kifuki ni kipĩngika.

²³ Kangi lilino ukwisa ukugomokela ku k̄aya polelo, nkati muno, kangi une āngàli mfikile ukusuluka ulubunju ulu lumo ukwipũtila bamo mwa babine. Une ndinasyo fĩngi fya nyāngalo isi sikugũlila, inōngwa isi bamo mwa bēne une n̄alyāndilèko ku masiku mabili aga gākīndāga ukufuma p̄apo une ndi apa, mfumile pakugũlila u mwēsī ukufuma p̄apo nasōkilèpo. Pop̄apo abēne bikugela ukufikamo ku abēne itolo nu bwēngo bo m̄umo abēne babagĩlile, ukubāga abēne ukufuma mabuyo amakīndānekīndāne kũko abēne bikwītũgala.

²⁴ U Ntwa itikisiyege, mu milungu mibili imingipo, une ngubũkaga ku Tucson, ikyo kyo p̄asi ikiyabo kya p̄asipo. Kangi lilino aba nyambalabakyulusi akabalilo aka, polelo ugwe ubagile ukwipũtila iki. . . Une ngakiganamo siku ikindu kilikyosa mpaka ukwanda une ngwitika ikyene kyo bwigane bwa Ntwa. Lilino, ulukomāno-ulukulumba ulukōnge lukwīsapo mu Modesto kangi polelo ukufuma kula ukubũka ku kiyabo kya Washington, Washington, kangi ku Zurich, polelo Palestina, kangi polelo mu South Africa. Kangi ikyo ikyo kikubōmbigwa pakati pa lilino na Juni. Kangi une n̄abilikigwe ukuya njobi ku ngomāno-ingulumba syōsa isi. Kangi ikyēne kibagile ukumba une ulusako ukwĩngĩla mu South Africa kangi. Ukukōlèla kwābo, umwēsī guligōsa uswe tukuya nububilikilo. Lōli linga yumo. . .

²⁵ Kulipo ukupāgukāna ukunywāmu mfipānga, ifipānga fyaPentekisti. Kangi linga ugwe kubũka ku lubafu lumo, ulũngi lutisakuyanakyo nakimo ikyākubōmba ni kyēne. Kangi abene batisakupilikikisania palikimo mma, polelo une n̄imile itolo lilino ku f̄yinja ukufwana fihano nu bukōlelo mu ndumbula yangu ukubuka. Kangi lilino, lumo linga abanyāmbalabakyulusi bisakunyēgelamo une nkati, itolo ikyākufwāna ukuya mwālīgwe, ikyo kyo ukufuma ku mbafu syosa ibili, umwe muketile, kangi polelo ikyo kikipela abene bosa ukwisa ku butali. Abēne bōsa bikufimbilisigwa nu kubōmbelana mu kila panongwa yakuti ifũmbwo fya hela syābo—ifũmbwo sya fipānga fyābo fili pala, polelo abene bikufimbilisigwa ukwisa ukupoka ikisyo kyabo, umwe muketile. Polelo lumo ikyene kibagile ukuya bwīgāne bwa Ntwa, lōli, une ngamanya. Ikyene kikipilikigwa kinunu, loli une ngamanya.

²⁶ Kangi polelo, mu kyĩnja iki, Nkundwe Borders āmbèle une ulubatiko lwa bwēndo, pamo, imbilikilo. Kangi, nubwānalōli, ilyēne lyālī buku kabili-kōsa ubupapati *ubo* ifi f̄isilemo ukufuma Krismasi iyi yikīndile, ifya mbilikilo ukusyũngũtila. Ikyēne kyo f̄ĩngi f̄iyo kuli ilinogonelo lya bũndu ukugela ukulĩngānia ikyēne mōsa, pop̄apo une ndinkusita kwēga kumo mwa syēne. Une ne itolo ngwegaga ulukomano lumo, nukugũlila nukukéta kũko

u Ntwa ikumbula une ukubukako ukufuma kula, polelo une ngubukaga kuko, kangu polelo nukukonga, kangu kulikosa kuko Umwene ikumbula une ukubuka. Polelo, umwe nyiputila une.

²⁷ Une ngukumbukila nkyinja, ukusuluka nu Nkundwe... pamo Kalumbu Cox pāsi pala, akabalilo kako Nkundwe Arganbright alingolile une ukubuka pa bwēndo ubu ku Anchorage. Bule līnga une nābagile ukuti nābūkile pa kila itolo ukwīsila mukusakikisya ukuti icyēne kyāli kyōsa kanunu?

²⁸ Lilino, une ninogonaga ukuti, *kusakisya*, une nālumbilīle pa kimanyisyo kya icyo. Une nātīle akabalilo kāko une nābūkile pānja pala, nābabūlile abalumiana ba tepi, “Komma ukwēga nagamo amatepi. Komma ukubūka pānja panongwa ya matepi mma, une nisakulūmbilila pa fimanyisyo filafila une nābōmbīle apa.” Une ngwinogona une nālumbilīle bumo ubu une nābōmbīle apa, fyōsa fya ifyēne fyāli fyōsa fīpya. Kangu Nkundwe Maguire alinkwēga ifyēne, fyōsa fya ifyēne.

²⁹ Kusakisya. Popāpo linga une nābagile ukuti nābūkile, *ngusakisya* pamwanya pala, icyēne āngāli kikuya nalōli kyakukīndāna ukukīnda iki icyēne kyāsanwīke ukuya, imboniboni āngāli fikafwānikisigwa. Lōli imboniboni yāfwānikisigwe, kangu umwe mwēsa mumēnye isya icyo, mūmo u Ntwa nalōli āsayile.

³⁰ Lilino, kilipo ikindu ikingi iki kili pa ndumbula yangu akabalilo katali. Kipanga, iputa panongwa ya kyene. Mwesa umwe bāndu apa mumenye icyo ukufuma pāpo une nāli ndumiana nnini une ngayamo siku gwākūkutisigwa nkīsu iki. Indumbula yangu yosa yilōndīle akabalilo kosa kuli u Bwingil’ilisuba. Kangu une ngukūmbukila akabalilo kāko une nāsēngāga ilīsu kuli umāma-unko gwāngu pamwanya pala mu kabuyo akanini aka kāli i...kāli ka kipanga apa, ubuyo bula. Une nālītugesye pa mafyukilo, kangu u Mbepo Mwikemo āyobile kwa une, Umwene alinkuti, “Une ngabagila ukukindilila ukusaya ugwe mpaka ugwe nubwisusye kumbilikila Une, bo yu Abraham.” Muketile? Kangu, Abraham, Kyala ālimbulile umwene ukwipagula mwene nukubuka kwa yumwene. Kangu, akabalilo kako umwene abombege, umwene alinkwēga palikimo nu mwene ugwise, umwipwa gwake. Kangu mpaka Abraham lōsa ālimpilikile Kyala, polelo pālipo ubufwānikisye ubumālisigwe bwa iki Kyala ālimfingīle umwēne. Kangu ubupinye, kimo mwa mabupinye ubu bwālimbinyile une kuno, āli māma gwāngu. Umwe mumenye icyo. Kangu lilino māma abukile ukuya nu Ntwa Yeso. Kangu une—une ngamanya yo njilanki iyakusanukilako, kyo kiliku icyakubōmba, popāpo umwe nyīpūtilaga une.

³¹ Lilino, Nkundwe Neville, une ndinkusōka panja pa kigemo, une ndinkwinogona, “Ena, une ngusōka panja pala.” Yumo ālyāgēne na une kangu alinkuti, “Mwe, abene bali nu bubombelo ubukulumba fiyo ikilo iki.” Alinkuti, “Abēne bikuyaga

nu bubōmbèlo bwa bulūmbilili, ububōmbelo bwa nyĩmbo, ububōmbelo bwa nyĩpùto, kang'i polelo ukwēga ifyakusāngūla, kang'i polelo alinkuti abēne bali nako—nako ukusukana-injayo, u nngonelo, nu bubōmbelo bwa lōsyo.”

³² Une ndinkwinogona, “Nkundwe umpelakisa! Mwe! Mwe, fyosa ifyo, une mmenye iki kila kila, lumu ukufuma pa bulumbilili nubukafu kulubunju ulu.” Lilino, une ndinkwinogona, “Une nguselemukila mmwanya pala, lumu umwene isakundondaga une ukupa umugonesyo.”

³³ Kang'i umwene alinkuti, “Ngimba ugwe ubagile ukuyoba kuli uswe ikilo iki linga ugwe kwipilika kulongosigwa?” Polelo une mmenye iki kila kikusanusya. Popāpo polelo une ndinkugomokela nukwakwega i Lisimbo apa nukuya ni fisimbe panini, kang'i lumu u Ntwa isakundulaga une ukutwāla itolo i Ndumi imbimba iya sala sina, kang'i polelo uswe twisakuyaga nako ukwītu—ukwītu ukusuka-injayo, kang'i polelo u nngonelo. Kang'i polelo, kang'i, o, une, lumu une ngwisakufikaga mmalisisye akabalilo kala. Umma, une itolo nasūngāga kwa umwe. Kifuki maminiti malongo mabili, malongo matatu, kang'i polelo uswe tukuyaga nu losyo, malundi-... Ngimba fiki fikukonga iki, ukulilapalikimo? Mugonesyo gukukonga iki, polelo ulosyo.

³⁴ Lilino, uswe twe basāngalufu ukuti uswe tukuyaga pakōsigwa. Lilino, linga Kyala ikwitikisya kang'i ikyo kikunhobosya Umwene, kang'i ikylene kyo kyosa kinunu nu ntimi na bandu, Ndungu ugu gukwīsa une nisakuyaga ngusulukaga ukwīputīla ababine, nukuyoba, linga u Ntwa ikwītikīsa, pa Ndungu ugu gukwīsa, 'nongwa yakuti une lumu pa Ndungu ugu gukukōnga une nisakuya nsōkilēpo kang'i akabalilo kala. Kang'i lilino akabalilo kako une ndi muno, une ngulonda ukwisamo kang'i—kang'i ukuyoba apa, panongwa yakuti uswe mu luko lumu twibungenie palikimo bo bakundwe, kang'i Nkundwe Neville na une apa, kang'i uswe—uswe tugānēne yumo nu nnine, kang'i uswe—uswe—uswe tukulōnda ukwitugasya kifuki nukutūlana yumo nu nnine bo . . .

³⁵ Iki kikipilikigwa kyamahelu, loli une ngusubila ikylene kitikipilikigwa injila yila kwa umwe, Tata. Cory alinkuyoba akabalilo kamo, umwēne. . . Une nāli mu lusanio lwa nyāle, ngulisya amagulobo kuli kamapani yila. Kang'i umwēne ālyūlile amīngi ikilūndiko kya magulobu aga gābagile ukunkyūnga umwēne ku fyīnja fina pamo fihano, une ndinkusyūmbutūka ukusyūmbutuka nukummūlila i Ford kuli umwēne. Umwēne alinkuti, “Billy, une ngusūbila uswe twe itolo tukutunusania inyūma ya yumo nu nnine.” Polelo ikyo kyo, ena, itolo mu luko lumu ukutula nkabalilo ka kufūmbwa. Polelo ikyo kyo—uko ko kutalusya. Uswe tumenye akīsilo ku buponesyo bwa yumo nu nnine nukutūlana yumo nu nnine.

³⁶ Lilino, unko uswe tubūke ku kiyabo ikyabwanaloli ikya ikyēne lilino, kangi linga une ngasoba, une ngusubila une ngumbona Nkundwe Beeler kunyuma kula ku nyuma, undumbilili unkundwe uyungi. Kangi umwīsyūgu akabalilo kākō une nākīndága, Nkundwe Junie Jackson ālīmīle pānja apa mu lubīngilo nu Nkundwe Creech. Ngimba abene bali nu lukomano apa utubalilo tumo? Ulubōmbelo lwa lōsyo, une nguketa. Umma ndaga, uswe tubagile ukupa amīsi linga abēne bisakummwāgaga umūndu. Uswe—uswe tulinago amīsi, umma ndaga.

³⁷ Polelo lilino, ukuya ukuti uswe tukuyaga nu mugonesyo, Une ndinkwinogona ukwene kukuyaga kununu linga une njobilepo pa mugonesyo itolo ku maminiti manandi.

³⁸ Lilino, bo tukāli uswe ukusegelela ku Lisyu, unko uswe tulāmbalike palubafu kilikyōsa lilino, na njila syōsa isya bwānike nu bukeke bwīnu, kangi—kangi ukwisa mu Kuyapo kwa Kyala nu lwiputo. Unko uswe twipute. Lilino ni mitu gyitu ginamisigwe, kangi une ngusubila indumbula syitu yope, linga kulipo ukusūma nkati muno kūko kwābāgile...ugwe kulōnda ukuya kumanyigwe kwa Kyala, kangi kulōnda kuli une ukukūmbukila ugwe pankyēni pa Kyala, ubagile ugwe itolo ukwitikisya ikyēne kiyege kimanyigwe ukwisila mu kufyūsyā ikiboko kyāko kwa Kyala. Kyala paga kilikyosa kangi ubusūme bwa aligwesa.

³⁹ Kyala Mwenemaka, u Tata gwa Ntwa Yeso Kristi, Yūyo ālimfyūsīsyē Umwēne ukufuma ku bafwe nukumbika Umwēne ku kiboko ikililo ikya Butwa, bwila-siku ukuya nu bumi ukutēndēka ubwīmīlīli pakati pa findu ifi uswe tukusūbila ukuti Umwēne ābōmbīle kuli uswe, nukulāta ikyēne ukuya lūlo. Uswe tukusuma, Ntwa Kyala, ukuti ikilo iki, ukuti Ugwe kutuswaga imbībi syītu. O, uswe tukulōnda ukūmilisya pāsi pa Lilopa pa tubalilo tosa, kabuno uswe tukamanya itolo iki kibagile ukuboneka. Fyosa ifindu fili kifuki fikumalikila, uswe tukwīpilika, Ntwa, ukuti ukwisa kwa Ntwa kuli kifuki. Kangi uswe tukwitendekesyela ku kwēga i njila. Kangi bo uswe tukwīnogōna isya bwēndo, uswe tubagile ukwīnogōna isya ifikwāma, kangi—kangi imyēnda igwākōngelelāpo kangi ifilato ifyākōngelelāpo. Lōli bo bulebule kikīndēne ukufuma ku bwēndo ubu! Ubwēne bukaya ku lūndika; ubwēne bo kutūla-pāsi, nukulāmbalika palubafu. Ukuya mbombi Gwako unkulumba, Pauli, āyobile mwa Buku gwa Bahiburi, pantu gwa 12, “Uswe tukulāmbalika palubafu ubusito bulibōsa nu busitakwītika ifi fyo nubupepe fikututabania uswe, ukuti uswe tubagile ukubopa nu bufindang’oma u lubope ulu lubīkīgwe pankyēni pa uswe.”

⁴⁰ Kangi uswe tukabagila ukusolola lilino isya findu ifinunu ku kisu iki ikyamwisyugu. Ikindu kyene iki uswe

tubagile ukusolola ukwisila mwa Mbepo bo butolwe, indamio, abakasenyenda, amayiga ga mōgèsyo amakulumba, ilisuba nu mwēsi fikutoligwa, i kipanga mu ngulilo ya Laodikiya, Kristi panja pa kifigo, ikukung’usya ukuti ingile. O Kyala! Itolo bo yu Mikaya gwaiyolo, ngimba umwene ābagile bulebule ukusaya Ahabu akabalilo kāko ubusololi bwāli bukulwana nu mwene? Akabalilo kāko unsololi unkulumba ugwamaka yula, Eliya, alinkusegelela ku mwene, kangi panongwa yakuti umwēne ālyēgile u būmi bwa nnyāmbāla unsitabusobi yula, Naboti, popāpo umwēne alinkuti, “Imbwa sisakumyānda i lilopa lyāko.” Polelo ābagile bulebule Mikaya ukusolola ifindu ifinunu?

⁴¹ Babagile bulebule abāna abīsusigwa-na-Mbepo aba mwīsyūgu ukusolola ifinunu ku bandu abōnangi, abāndu abasitakupasya aba bālinkagile u Ntwa panja? O Kyala, uswe itolo tukukēta ububābe bwa bulōngi pankyēni. Kangi ukukūta ku bala bābo bakaya batalusye, “Bopela ku Ntwa, kabuno Umwēne yo Lyālabwe nkīsu ikyābukatale! Umwēne yo Kiponesya nkabalilo ka mbelo. Kangi i Ngamu ya Ntwa kyo Kisōnge Kyamwaka, kangi abagolofu bikubopela mu Kyēne kangi bikupona.” Ngimba uswe tubagile ukwinogona bulebule isya utwaya utunywamu tula tuyengigwe, utwa mbuponelo, kangi akabalilo kāko umbopesi. . . ukufuma pāpo unnyāmbāla yula kangi umwēne āfikile mu—mu busōnge, umwēne āponile, nakimo kyābagile ukumpalamasya umwēne. O Kyala, unko uswe tubope kangi tuyege-bēngo kwa Ntwa, kabuno Umwēne yo Buponelo bwītu na Maka gītu, kangi u butuli bulabula ubuyepo nkabalilo ka lutamio. Popāpo, ukwīsila mukukēta ukwīsila mu kisige kya ngwāsi, bo mūmo ikyēne kyāli, ukupela ulutamio mōsa, amabīngu gikubuna, injasi ni kimwekumweku kya bulōngi kikupāpa pa kīsu, uswe tumenye ukuti umbelo guli ku kiboko.

⁴² Ikilo iki, Ntwa, uswe tukubīputīla aba apa aba bafyūsīsye amaboko gābo. Une ngamanya iki abene bālonidaga, Tāta, Ugwe kubomba. Une ngusuma ukuti Ugwe kutupaga kilikyosa ku myoyo gyabo imipala, ukuti ulusanusyo kunyuma kwa kiboko kila kyāfyusigwe kuli fiki. Tupaga ikyene, Ntwa. Bumbulusyaga ababine. Sūbisyaga abakatale. Pāga ubusāngalufu ku bakonyōke. Paga u lutēngano ku bakatale, ikyākūlya ku bānjāla, ikyākūnwa ku būmīlwe, ubuhobofu ku basulumanie, amaka ku kipānga. Ntwa, ntwala Yeso pakati pitu ikilo iki, bo uswe tukwītēndekesya ukulya ungonelo ukwimila umbili Gwāke umbongotoligwe. Uswe tukusuma, Ntwa, ukuti Umwēne isakutuyātīla uswe mu njila iyapamwanya.

⁴³ Sayaga ikilundilo ikinini iki, untimi gwake unganigwa, u Nkundwe Neville ni kikolo kyake, kangi abadiakoni, abakyūngafyūma, kangi umūndu aligwēsa uyu ali apa. Sayaga abangi, Ntwa, mosa ukusyūngutila nkisu, aba bikugūlila nu buhofu bwa kwisa kwa Ntwa, inyāle sitēndekesigwe, na

pabusōkèla-lyōsi pōsa papupūtīgwe, kangi u Lumuli lwa Nongwainunu lukumulika mmabuyo agāngisi.

44 Lilino, ndula une, Ntwa, na Masyu manini aga. Sayaga Ilyene bo uswe tukubala Ilyene, kangi tupaga uswe ulwalo lwa nongwa, kabuno uswe tukusuma ikyene mu Ngamu ya Yeso. Ameni.

45 Lilino uswe tubagile ukusanukila mwa Buku, ku ntu gwa 6 ugwa Mwikemo Yohani, kangi ikyene kikuyaga kinunu linga aligwesa gwa uswe twābalile untu gosa ugu akabalilo kako uswe twabukaga ku kaya. Une ngulōnda ukubala, ukwanda pa linandi lya 47, pāsi ku lya 59, ukōngānia, itolo ku njila ya kuyenga untu pa kimanyisyo kya: *Mugonēsyo*.

Yeso ikuyoba lilino, ku lusekelo. Akene kāli kabalilo akakulumba, isekelo isi syāli. Abēne bānwaga amīsi ukufuma ku lyālábwe, ukwīmīlīla i Lyālábwe ili lyāli ndulangalanga. Kangi abēne bālyāga, ku manna aga gāgwīle a bamia ba fyīnja fīngi ifi fikīndīlēpo, mu lukūmbusyo. Ulwene lwāli itolo lusekelo lwa pāsa, mumo uswe tulinalo ikilo iki.

*Naloliloli, naloliloli, une nguyoba kwa umwe,
Umwene uyu ikwitika pa une ali nu bumi bwa
bwilabwila.*

Une ne nkati gwa būmi gwa.

*A batāta bīnu bālīle a manna mu lulangalanga, kangi
bafwīle.*

*Ugu go nkati ugu gukusuluka ukufuma ku mwanya,
ukuti u nnyambala abagile ukulya ukufuma kugwene,
nukusita kufwa.*

*Une ne nkati uguwābūmi ugu gwālisīle pāsi ukufuma
ku mwanya: linga u mūndu aligwesa ikulya ukufuma ku
nkati ugu, umwene isakwītūgalāga kwa bwīlanabwila:
kangi u nkati ugu une nisakupa go nyōfu gwāngu, ugu
une nisakupa kuli u būmi bwa kīsu.*

*AbaYuda polelo balinkulwāna pakati pa bēne,
bikuyoba, Abagile bulebule u nnyāmbala uyu ukupa
unyōfu gwāke ukuti tulye?*

*Polelo Yeso alīnkuyoba ku bene, Naloliloli, naloli, une
nguyoba kwa umwe, Pene papo umwe mukulya u mbili
gwa Mwanundumiana gwa mundu, nukunwa ililopa
lyake, ugwe ukaya nabo u bumi mwa ugwe.*

*Uyu naloli ikulya u mbili gwangu, kangi ikunwa
ililopa lyangu, ali nu bumi bwa syepwa; kangi une
nisakusyusya umwene pi siku lyabumalikisyo.*

*Namanga unyōfu gwāngu kyo kyākulya nalōli, kangi
ililopa lyāngu lyo kyākunwa nalōli.*

Umwēne uyu ikulya u unyōfu gwāngu, kangi ikunwa ililopa lyāngu, ikwitūgala mwa une, kangi Une mwa umwēne.

Mūmo u Tāta gwābūmi āndumile une, kangi Une ndi mūmi ukwīsila mwa Tāta: momūmo umwēne uyu ikulya une, yope umwēne ikuya mūmi ukwīsila mwa une.

Ugu go nkati gula ugu gukusuluka pāsī ukufuma kumwanyā: komma mūmo abīsēmwe balyēlile a manna, kangi bafwile: lōli umwēne uyu ikulya . . . u nkati ugu isakuya mūmi kwa bwila.

Ifindu ifi aayobile umwene mmasunagogi, mumo umwene amanyisiisye mu Kaperenaumu.

⁴⁶ Untwa alisayaga Ilisyu Lyake. Une ngulonda, itolo ku maminiti manandi, ukuyoba pa: *Mugonesyo*. Ngimba i lisyu lya *mugonesyo* likusanusya fiki? *Ukulunganisania* kokuti “uku yoba.” Ukuya nako, uku. . . *Mugonesyo* naloliloli kukusanusya “ukuya nu bulilansi, yoba nu nnine.” Linga ugwe kuyoba pa foni ku munduyumo, ugwe kupimba ubuyobesanie pala, ugwe kuyobesania yumo nu nnine. Kangi linga uswe tubagile ukwisa palubafu nu kwima kunyuma ku nyuma ya nyumba, aligwesa pamwene nu ntimi, pamo abandu babili balibosa, abene bikulilanila yumo nu nnine.

⁴⁷ Lilino, ugwe utikuyobasania ukwisila mu rediyo, panongwa yakuti ugwe ukabagila ukwāmula, pamo televizioni. Loli akabalilo kako. . . Ugwe ubagile ukwisila mu telefoni, panongwa yakuti ugwe kuyobesania yumo ku nnine, itolo lukaya lubafu lumolwene. Ulwēne luli. . . Une ngabagile ukuyobesania nna umwe lilino, panongwa yakuti umwe mutikuyoba ukugomokesya mma. Popāpo, polelo, ikyēne āngali kitikuya ukwisa ukupilika undumbilili ukutwāla i ndumi yāke. Ikyo kitikuyaga mma, ukwisa palikimo, ukuyobesania. Ukuyobesania āngali kutikuya ikyo. . . Linga ugwe kwisa itolo ukulunganisania nu ndumbilili, ugwe āngali kunkōléla umwēne ku lubafu lumo, pamo aligwesa pamwene, kangi kulunganikana nu mwēne pamo umwēne.

⁴⁸ Lōli ku iki uswe tukwīsamo, u mugonesyo, ko kuli aligwēsa gwa uswe ukuya pamwenepamwene ukulunganisania na Kristi. Uko ko kulunganikana. Polelo, ukulunganisania kukaya palikimo *yumoywēne* ikubōmba ukuyoba mma, uswe tukubōmba twēsa u kuyoba, loli tukugulila nukukéta iki Umwene ikuyoba ukugomokesya kwa uswe.

⁴⁹ Lilino, apo po pāpo, utubalilo twīngi, ukuti uswe tukutēndéka ubusobi bwītu ubukulumba, ko, uswe tukubōmba bōsa ubuyobi kangi tutikugūlila nukumpa Umwēne u lusako ukwāmula ukugomokesya. Uswe tukubūka utubalilo tumo, tukuyoba, “Ntwa, une āngali nguti Ugwe ubagile

ukubōmba *kyakuti-na-kyakuti* kangi *kyakuti-na-kyakuti*, ameni,” nukusōkápo nukusōkápo. Lilino, ikyo naloliloli kikaya kuyobesania. Ikyo kyo kikubuka nukusuma ubutuli. Loli akabalilo kako ugwe kusyala kubutali fiyo mpaka Umwēne ikwamula ukugomokesya, apo po pāpo ugwe kwisa kuya nu mugonesyo, ukuyobesania nu Ntwa. Lilino, kangi injila ingulumba iyakuyobesania, ko kwitikisania, umwe mukufimbilisigwa ukwitikisania pa findu fimo. Lilino, kangi ikyene kyo kihesya ukuti utubalilo tumo akabalilo kako uswe tukukaba ifindu ifyo. . .

⁵⁰ Ukulya ko kufwēnemo ni kyēne. Lilino, ugwe ega abāndu ba bukyulusi, akabalilo kāko abēne bikulōnda ukutēdeka ukwitikisania kwa bukyulusi, abēne bisakunkōléla umundu yumo pānja ukulya ifyakulya. Kangi ukufuma pāpo abēne bitūgēsye pāsi nukulya, kangi polelo ukuyoba na yumoywene nu nnīne. U nnyāmbala unnunu unkyulusi, kingikingi umwēne akabagila ukuyoba ku mūndu bo mūnda muli itolo. Ikyēne kinunu ukukīnda ukugūlila mpaka umwēne ikwīpilika kanunu, kangi polelo ukufuma pāpo umwēne alīle ifyakulēmbusya. Komma ukufika kula nukummwēga umwēne ukufuma ku kitala nukumbula umwēne isya kindukimo ugwe kufimbilisigwa ukummūlisya umwēne, lōli gūlila mpaka umwēne alīle ifyakulēmbusya fyāke kangi—kangi abikīgwe lōsa kanunu nkyayīlo.

⁵¹ Iisiku limo, ukulumbilila pa nkikulu uyu ālyosisye amalundi ga Yeso, pamwanya mu Canada une nāyobaga iki, nguyoba nguti akabalilo kāko u nhēsya ālīsile ukunjātīla umundu yumo, umundu uyu āli nu tundendeko tumo abēne bafimbilisigwaga ukubūkamo ukukīnda bo bakāli abēne ukwīpilika bafwāne ukwīsa kukuyāta, pamo, ukuyobesania. U luyāto ko kuyobesania. Lilino, abēne bābagīle ukwisa ku. . . Ukukōlelīgwa, ikyākwānda ugwe gwābagīle ukukōlelīgwa. Polelo ugwe gwābagīle ukwīsa ku kifigo kangi undumiana ābagīle ukusuka injayo syāko, panongwa yakuti ukwēnda, ugwe gwāli nu kunūnga kwa i—kwa i finyamana na fyōsa bo ifyo mula mu nsebwe. Abēne bōsa. . . abāndu balinkwēnda injila yilayila ni kinyamana, kangi—kangi polelo kwālipo ukunūngīsya kangi ulufūmbi, kangi umwēnda gwa kiPalestina gulinkupimba ulwēne mmwanya kangi ulwēne lwasengamaga pa lifuke lya kilūndi, kangi i kisyo kūko ikyēne kikasīngigwe, kangi—kangi pa maboko. Kangi—kangi abēne babagīle ukubakola abēne pa kifigo, undumiana ābagīle, kangi ābagīle ukusuka injayo syāke. Kangi polelo u nnyāmbāla uyūngi ālīmīle pala ni kifūnga kangi ni—ni supa, kangi abēne bābagīle ukunyāfila i supa iyi pa maboko, kangi abēne bābagīle ukugūsa ikyēne bo *ulu*, kangi—kangi ukugūsa ikyēne pa kisyo kyābo, polelo ukwēga ikifūnga nukwifyūla bēne. Ikyo kyālyēgīle ubufīte bōsa kangi ukunūnga. Kangi ikyēne kyābagīle ukuya ni kindukimo mu kyēne iki

kyāpaga ulupūpwo, ngati mentholo, kangi ikyēne kyāpelaaga abēne ukwīpilika kanunupo.

⁵² Polelo akabalilo kāko abēne bālingile nkati, komma ni fyaiyolo ifilato ififite ufwēle mma, ifilepukelepuke ifinīni fila, abēne bābagile ukuya na kanīni, ngati akanīni akapatapata ka nnyūmba, kangi abēne bābagile ukwīngila nkati. Kangi polelo u—u nhēsya ābagile ukubūka nkati kangi—kangi polelo u mwenekaya ābagile—ābagile ukumfipa umwēne ukumwāmbilila. Kangi, muketile, ugwe ukalondaga u mwenekaya ukukufipa ugwe linga ugwe gwānūngàga ububibi. Ugwe āngāli utikulōnda ukwīngila nkyēni ni filepukano akabalilo kāko ugwe gwāli mfitāno. Kangi polelo u mwenekaya isakukufipa ugwe ukwambililigwa, kangi polelo ugwe gwāli itolo yumo gwa nyumba.

⁵³ Kangi, lilino, Kyala ali ni findu bo ifi. Bo uswe tukwisa naloliloli tukwitendekesyela ku bufwanikisyo bwa Kyala, uswe tukufimbilisigwa ukwanda ukusukigwa na misi ga Lisyu. Bwīpāgūlo, amīsi ga bwīpāgūlo aga gikupāgūla uswe ukufuma ku mbībi. Lilino, ikyākwānda, ugwe ukabagila ukuyoba kwa Kyala kangi ugwe ukabagila ukuyobesania na Kyala, kangi kilipo. . . Ikyākwānda, ugwe kufimbilisigwa ukupinduka ku iki ugwe ubombile, panongwa yakuti ugwe ukabagila ukwitika nubutalusye mpaka ugwe kupīndūka, “Ntwa, hobokela ubusitalwitiko bwangu.” Muketile? “Hobokela ubusitalwitiko bwangu.” Ugwe kufimbilisigwa ukupinduka, ukwanda. Kangi, akabalilo kāko ugwe kupīndūka, polelo ugwe gwe. . . imbībi syakunyuma isyāko sihobokeligwe, polelo ugwe gwakubaligwa polelo kuli u lōsyo. Lilino, polelo Umwene āfingile u Mbepo Mwikemo, ukufuma pa lōsyo.

⁵⁴ Lilino, ikindu kyo, ukuti, pa buyobesania ubu, uswe tukusyāgānia ukuti kwālipo u—u kusuka-kwa-njayo ni fīndu kufwēnefwēne na ikyo, kyōpe, ukōsya injayo syītu, ukuya kimanyilo kya ubwīfyūsu bwa Mbepo Mwikemo.

⁵⁵ Lilino, polelo, pabagile ukuyapo ubwīpilike bwapababili. Linga ugwe uli ba lwēnge nu gwāko—gwāko u mwenekaya, polelo ugwe—ugwe ukabagila ukuyobesania. Umma, ugwe—ugwe ukabagila ukubomba ikylene, panongwa yakuti ugwe kukanikana nu mwene. Lōli linga ugwe uli mu kupilikisania, polelo ugwe ubagile ukuyobesania. Polelo iyo yo njila iyi ikylene kiyilile akabalilo kako uswe tukwisa ku kigemo kya Ntwa, uswe tukufimbilisigwa ukuya mu kwitikisania ni Lisyu Lyake. Muketile? Uswe tukufimbilisigwa ukupapigwa kangi, u Mbepo gwa Kyala mwa uswe ikuyoba “ameni” ku Lisyu lililyōsa ili Umwēne asimbīle, polelo uswe tubagile ukuyobesania nu Mwēne.

⁵⁶ Iki uswe tulikyo ikya Kyala, linga indumbula syītu sikututobesya uswe, polelo uswe tuli nu bukundwe na Kyala.

Uswe tumenye uswe tukufyāga ifisūme fyītu kangī ubusūme bwītu, yo nongwa yakuti indumbula syītu sitikututobesya uswe. Lilino, linga Kyala ikutubūla uswe tubagīle ukupāpīgwa kabubili, kangī uswe tukambilīla ubupāpīgwe ubupya, polelo uswe tukwipilika ikyabuhēsya ukusyungutila, ukunsuma Umwene kalikosa, muketile, panongwa yakuti uswe tumenye uswe tukafwanikisya indalusyo Syake. Ikindu kyene polelo lo lwīpūto lwa ntulwanongwa. Loli uswe tukuyoba nu Mwene akabalilo kako uswe tuli mbulilanisi nu Mwene, ikyo kikutwala ubuyobesania.

⁵⁷ Lilino, iki ikyākusanusya kya mugonesyo, une ngulonda ukulīngānia pa kabalilo kanini. Lilino, uswe tukwēga, iki uswe tukukōléla *mugonesyo*, yo nkati nu bwālwa. Lilino, ikyo kyo fiyo kikīmililigwa kanunu mma mpaka ikyēne kikaya nakanunu mma ukuyoba isya ikyēne. O, mūmo ikyo kikīmililigwa kanunu mma ukusuluka ukukīnda mfyīnja! Uko ko naloliloli kukaya kulilapalikimo, uko ko itolo ukukyūnga ingomelesyo. Muketile? Lilino, inongwa iyi uswe tukukikōléla ikyēne mugonesyo, yo nongwa yakuti ikyēne kikufumila ku kibugutila kya Katolika panongwa ya “Ukaristia Umwikemo, iki kyo naloliloli mbili gwa Ntwa Yeso.” Lōli ugwēne gukaya go mbili gwa Ntwa Yeso! Ugwēne go itolo lukumbusyo lwa mbili Gwāke.

⁵⁸ Une ndikupāsya bo balinga bapūti pamo abalumbilili, pamo aligwesa ikusaya ikyo, ugwēne gukālī nkati nu bwālwa. Akayapo umputi bo uswe...abene bikutubula uswe, ikyo, “Kyala abagīsenie ukupilikisya ku mpūti akabalilo kako umwene ikusanukila ku mugonesyo,” iki abene bikukikōléla mugonesyo, “Ukaristia, ukuya mbili gwanaloliloli ugwa Ntwa Yeso. Polelo u mwitiki ikwega ikyo, kangī ugo go mugonesyo.” Ikyo kyo kisobi!

⁵⁹ *Ukuyobesania* ko “u kuyoba ku, ukuyobesania na, kindukimo iki ugwe kuyobako kangī ikyēne kisakuyoba ukugomokesya kwa ugwe.” Uko ko kuyobesania. Akabāma kakabagīla ukuyoba ukugomokesya. Popāpo, nalolilōli, u mugonesyo gwānalōli yo Mbepo Mwikēmo ikuyoba ukugomokesya. Akabalilo kako ugwe kunsuma Umwene, polelo Umwene ikuyoba ukugomokesya, ugo go mugonesyo untalusyi. *Iki* kyo kikūmbusyo, ukwēga i...ikya bukomeligwe Bwāke kangī u busyūke Bwāke, kangī komma u mugonesyo. Uswe tukukikōléla ikyēne ikyo, lōli ikyēne kikaya mma. Ikyēne kīsile ukufuma ku kipānga kya Katolika, ikya kwēga ikibāmba iki bo mūmo uswe twākīndilēmo i lisiku ilīngi mu lubātiko, kangī ukuyoba isya ikyēne pa *Ubwiputafifwani Ukulwana ni Kikristi*.

⁶⁰ “Mūmo fikuti akanini aka akabāma akākusyūngutila ko mbili gwanaloliloli gwa Kristi.” Lilino, i kipanga kya Katolika kikwitika ikyo. Ngimba umwe muketesisyemo siku, ukukīlania ikipanga, abene bikwipīngika bene, ukupimba ifitili fyabo, na

fyosa? Ikyēne kikaya kipānga, ikyēne kyo kibāma nkati mula, “u mbili gula ugu u mpūti asanwīsyē ukufuma ku kabāma ukubuka ku mbili gwanaloliloli gwa Kristi,” kūko imbeba ni ngēnge sibagile ukusōsyāpo ikyēne. Fiki, ugwe utikubōmba, kabagila ukwīnogona mwābūndu, nukwīnogona ukuti akayabo ka nkati kabagīle ukuya mbili gwa Ntwa Yeso! Ikyene kikabagīla ukuya.

⁶¹ *Mugonesyo* ko “ukuyoba, kangi ikyene kikuyobela ukugomokesya, ikindukimo iki ugwe kuyobagako.” Lilisyu lilalila *ukulūnganisia* kokuti “ukuyoba ku,” pamo, “ukuya kubōmbelana ni kindukimo iki kikuyoba ukugomokesya kwa ugwe.” Kangi Kyala ikuyoba ukugomokesya kwa ugwe, mugonesyo. Kangi ugwe gwēne gukālī nkati nu bwālwa, ugu uswe tukukōléla *mugonesyo*.

⁶² Lilino, Yeso āyobīle apa, bo une ngubala, “U mbili gwāngu go kyākulya kangi kyākunwa, i Lilopa Lyāngu, mbili ni Lilopa lyo nyama nukunwa.”

⁶³ Lilino, uswe tukulonda ukwinogona isya Yeso nu kubōmbēla nu Umwene, iki Umwene aali. Ngimba u mbili Gwake go fiki? Ngimba u mbili gwa Kristi go fiki? Ikyēne go mbili gwa bītiki aba bikubōmbelana nu Mwēne mwa Mbepo Mwikemo. Komma ikifwani, komma akayabo ka nkati, loli u Mbepo yu ali mu ndumbula ya mwitiki, kangi abene bikubōmbēla palikimo, ukuti akabalilo kāko unnyambala na Kyala babagīle ukuyoba ku nnine, abanabalumiana na banabalindwana ba Kyala. Unnyāmbala ugwakufwa, ukwisila mu kōna kwa Lilopa kwātwele ubufyūle bwa butulwanongwa, kangi unnyambala uyu nu nkikulu uyu, ndumiana pamo ndindwana, uyu ali nu bulilanisi na Kristi, ikuyobesania nu Mwene, u mbili.

⁶⁴ Bo mūmo u ndume nu nkasi bābagīle ukwitūgāsya pāsi nukuyōba ikyēne mōsa, pamo u ndumiana nu ndindwānanganigwa gwāke, Kristi ni Kipanga Kyāke kikuyobesania palikimo. Iyo yo nongwa uswe tubagīle ukupilika ukufuma ku Mwene, nukukéta nkyeni pa nkyeni bo ikyene kikafika apa, nukuyoba kilabo ukuti ikyēne kyo kipelelesye, panongwa yakuti uswe tukuyobesania na Kyala Yūyo ikukoleléla Syēpwa nkiboko Kyāke. Ukuyobesania yumo nu nnine, u Mbili gwa Kristi, ugwambutitu, u Mbili ugwamwambepo ugwa Kristi. Komma ukubōmbelana nu luko lulilosa ulwa kifwani, pamo u nkati pamo u—u bwalwa, loli mu—mu luko lwamwambepo.

⁶⁵ Lilino, Yeso ayobile ikindu kilakila. Ugwe ega Mwikemo Yohani, untu gwa 4, ikuyoba ku nkikulu pa kisiba, umwene ayobaga pa kindu bo ikyo, “Aba tāta bītu bānwīle ku nyibuko iyi, nukukumba iki ikisiba, Yakōbe, kangi—kangi alinkupa isya bāna bāke kangi ing’ombe syāke isya mīsi aga, kangi Ugwe kuyoba, ‘Ipūta nkaya kamo *kakuti*,’ kangi abangi bikuyoba, ‘Mu kyamba iki.’”

⁶⁶ Yeso bo—bo bu bwĩngi bwa aba bāyobile, “Itolo i miniti! Uswe twe baYuda, kangi uswe tukupilikisya iki kyo fiki, iki ukwĩpũta kukusanusya. Loli pilikisya ku iki, nkikulu. Isala yikwisa, kangi lilino yo yili, ukuti abiputi ababwanaloli bisakwiputaga Kyala mwa Mbepo kangi mu Bwanaloli. ‘I Lisyu Lyako lyo Bwanaloli.’ Kangi u Tāta ikulondalonda u luko ulu lwisakummwiputa Umwene mwa Mbepo kangi mu Lisyu, u Bwanaloli. ‘I Lisyu Lyako lyo Bwanaloli.’” Lilino, Umwene aayobile ikyo ku nkikulu.

⁶⁷ Muketile, Kristi...Kyala yo Mbepo. *Kristi* kikusanusya “u mpakĩgwe yula, u nnyāmbāla umpakĩgwe na Kyala,” uyu ālintendĩke Umwēne ukuya Kristi. Lilino, Kristi āyobile, “Une ne Kyākulya kangi Kyakunwa.” Komma akabāma, komma akabāma aka uswe tukulya apa. Ako kakaya Kristi mma. U bwalwa ubu uswe tukunwa ku kigemo, bukaya Kristi mma. Ubwene bukwimila Umwene, mu njila yāfifwāni. Lōli Kristi yo Mbepo Mwikemo, ukupaka kuko kuli pa Kipanga, ikyo kyo Kyakulya nu Kunwa.

⁶⁸ Ingũto ingulumba ukukinda iyi yili nkisu kyosa, une ngusubila nayumo gwa umwe mupilikemo siku iyene, lōli, linga umwe mubōmbilēmo siku, yikayāmo i ngũto ukufwānikisigwa ni ngũto iya njala. Akabalilo kako ugwe kumbona u māma nu mwana gwake, kangi umwene akabagila ukwenda umwene monywa fiyo, kangi u mwana unnini ikufwa, nu lwānda lwāke lwĩswĩle ni njala, ukubapilika abēne bikulila ukufuma ku ndumbula ya māma yula, ukukēta aka bōnda kala na masaya gāke gagāndile nkati mpaka ikipapa kyābo ni fifupa, kangi utukenwe twāke utunini tukulāngāla, kangi umwēne akabagila ukutēndēka unjwēgo, kifuki, utusige twāke utunini tutūnwike pānja. Yikayapo ingũto ngati i njala ni kyūmilwa.

⁶⁹ Pānja mu lulangalanga, banyāmbāla balinga batāgila imyūmi gyābo ukufuma ku kyūmilwa! Utupāngo twĩngi, utu une mbagile ukūmilisya umwe ikilo kyōsa, isya tupāngo utwānalōli utwa lulangalanga. Mūmo fikuti akabalilo kāko ugwe kwēga...kuya ni kyūmilwa, mūmo u mōhēsī ikupa ugwe u—u bulāngalēlāngāle. Umwe mububwene ubwene apa, umwe mutikufimbilisigwa ukubuka Kubwingilil’ilisuba ukububona ubwene. Būka pāsī pa nsebwe, kangi ikyēne kikuboneka ngati galipo amisi pāsī pa nsebwe. Aligwēsa gwa umwe mukētīle ikyo, mwe mwēndisye iligali kangi muylēpo pa nsebwe—unkulumba. Ubo bo bulāngalēlāngāle ubusyōbi. Apa akabalilo kamo aka kakindilepo, ukufwana ifyinja fitatu pamo fina ifi fikindilepo, une mbalile kūko amasekwa gamo, gikupululuka ukukilania ikisu, gākētētīle i kilāngalēlāngāle nukugwa pa nsebwe, gikwīnogōna agēne gātīkāga a mīsī. Kangi agēne itolo galinkubongotoka, galinkutika u nsebwe nubukafu, gikwīnogōna agēne gāgwāga mmīsī, i kilāngalēlāngāle.

⁷⁰ Ko kalīnga u mōhèsi abōmbile ikīndu kilakila ku bāndu, ukubapa abēne ikilāngālelāngāle ikyabusyōbi, kūko, kikayako nakimo kula, lōli ikyēne kyo itolo bwīpēla-bwītiki. Bīngi fiyo abāndu umwīsyūgu bikwēga ubwīpūti ubwīpēla-mwītiki, ukugela ukutēndēka i kindukimo pamo ukwīpēla ngati kilipo ikindukimo akabalilo kāko ikyēne kikaya lūlo mma! Bo yu nkikulu ntumigwa unnini yula āyobile ukuti umwene āgūlīle mpaka umwene āli nsisimikisye. Uswe kinunupo tubombe ikyo. Ugwe ukabagīla ukugomokela nukugela ikyēne kangi. Ugwe uli nu lusako lumolwēne, kangi ugwe uli ni Kisīmbīgwe-kyakuketelelapo, popāpo uswe kinunupo tubūka ukusuluka ku bung'wāle.

⁷¹ Ingūto ya njala, pilikisya, iyēne yo ngūto ingulumba panongwa yakuti iyēne yo ngūto ya bukāmandīgwe. U mūndu yula ikufwa. Kangi, o, linga uswe tubagīle ukufika ku buyo bula, linga ikīsu iki kyābagīle ukufika pa buyo kūko ikyēne kyāyāga ni njala fiyo kuli Kyala! Ikyēne kili mu njāla imbībīpo ukukīnda ifīsu ngati India ifi fyo fyānjāla mu mbili, ikīsu iki kyānjāla mwāmbēpo. Loli ukufuma pāpo ugwe uli ni njala akabalilo katali bo ulo, ikyene kikwisa ku buyo ugwe kamanya ugwe uli ni njala.

⁷² Itolo bo ukutalala. Ukufuma pāpo ugwe kufika kubutali bo lula, kusalala, ugwe kufika ukuya ntalalifu fiyo, polelo ukukīndapo akabalilo ugwe kwisakuya mulūngūle. Kangi akabalilo kako ugwe kubomba, ugwe kufwa! Kangi ikyo kyo iki kitamisye ikilo iki. I fipānga fifikilepo ukuya fitalalifu fiyo mpaka ifyēne fikuya fitalale, kangi fikwīnogōna abēne balūngwilez, ukwisila mu bwīngi, kangi bikufwa mwambepo. Ukufwa! Batikumanya ikyene. Kubumalikisyo, umwene ikulambalala pasi ukugona utulo, kangi ifyo fyo fyosa fya ikyene. Umwēne atikusumuka kāngi mma, panongwa yakuti ililopa lyāke lyātalēle mu ndepa syāke.

⁷³ Lilino, ukumilwa. Yeso aatile, “Lilopa Lyangu kyo kyākunwa naloli.” Linga ugwe uli ni njala ku Būmi, kuya ni njala ku būmi, Yeso ali na mīsi go gēne aga gabagīle ukusimisye ikyūmilwa. “Isaga kwa Une, mwesa umwe mwe mukusukulika kangī muli nu nsigo unsito.” Kula mu Busetuli, ikyēne kyāyōbile, “Unko umwēne uyu ikūmilwa isēge ku nyibuko ya mīsi sya Būmi nukunwa mwaitolo.” Linga ugwe uli ni kyūmilwa kuli Būmi!

⁷⁴ Uswe tukukēta ukuti abafūnda-ndondwa bikulagusya, utubalilo tumo mu kiyabo kyakubwāndilo iki pamo ikiyabo kyakubwāndilo kya mwēsi, ukwānda pa lisiku lyākibili pamo lyākīhāno, pamo ubuyobumo nkati m'mwēsi ugu, abamanyandondwa ba kiIndia bikusakikisya ikīsu ukupufuka ntupatu. Kangi ikalatasi sya kiMerika sikūgīla ikyēne. Une ndīkwītika mma ukuti ikīsu kisakupufuka ntupatu, lōli une nalōli nguyoba ikyēne kyo kisobi ukūgīla ikyēne. Panongwa

yakuti, ikindukimo kitendekisye ukuboneka limo mwa masiku aga, ikindukimo ikifwâne na ikyo, akabalilo kâko ifisu fihano, Mars, Jupiter na Venus, kangî—na fyosa bo ifyo, fikwisaga mu fyabo—fyabo. . . Ifyêne fikakibombamo siku ikylene. O, abene bikwiyobela lumo ifyinja maelifu malongo mabili na mahano ifi fikindilepo, loli ywani agomokiile kula ukwakumanya ikylene?

⁷⁵ Une ngusakikisya ukuti iki kili nububômbèlo bwâmwbâmbèpo. Une ngusubila ukwene ko kwisa kwa nôngwa ya Kyala, ukuti u busetuli ubukulumba bwa Lisyu bwisakwîgulîgwa akabalilo aka. Kûmbukilâga, abêne bikwiyobela ikyêne kyâli indondwa sitatu syâlîsile mu mbusyûngutilo bwâbo akabalilo kâko Yeso âpâpigwe. Kangî isi syo sihana, kangî ihano lyo lipyâna, imbalilo ya lipyâna. Fitatu yo mbalilo ya bupelelesye. Fihano yo mbalilo ya ipyâna, Y-e-s-o, i-p-y-â-n-a, l-w-î-t-i-k-o, fyôsa bo ifyo. Mbalilo ya ipyana! Kyala ikutumamo siku a maka Gake ku kipanga, ikyêne kisakuyaga lipyâna Lyâke, ikyêne kitisakuyaga lupilikilo lwa bându. Kangî Yesaya aatile, mu ntu gwa 40, aka “kuutilo kwa Yerusalemu, ukuti ubwite bwake bumalike,” napâpo umwêne âlintobesigwe isya bwîputafifwâni, lôli ilyêne lyâli ipyâna lya Kyala ili lyâtumâga ikyêne. Kyala ikutuma kalikôsa kwa uswe, ilyêne lisakuyaga ipyâna Lyâke kangî komma ubwibagilile bwîtu mma. Polelo, ikylene kibagile ukusanusya ikindukimo. Une ngusakikisya ukuti kwisakuyangako ulwândulo. Une ngamanya iki ikylene kikuyaga, loli une ngwitika ikylene kitendekisye ukuboneka. Uswe tuli pa. . . papapa pa kifuki kya ikyêne lilino.

⁷⁶ Kangî linga unnyâmbâla aligwêsa ali ninjala, ndeke umwêne isege kwa Kristi. Linga umundu aligwesa ali ni kyûmilwa, unko umwêne isege kwa Kristi. Umwêne ikusimisya ikyûmilwa. Umwêne yo Mwîkutisi gwa kyôsa ikyîtu ikyûmilwa ni njala.

⁷⁷ Une nâli na kapango aka kâyobigwe kwa une akabalilo kamo aka kakindilepo. Une nâbagile ukuti nakibûlile ikyêne mu kipânga iki. Linga une njobile, umwe nhobokela une panongwa ya kwândisya akêne itolo ukutika utufûndo. Âliko u kalôngolêla gwa kiMwênye, pamo, u luko lwa nkêtêsi gwa baMwênye. Umwêne êndâga nkisu kya Navajo, kângî âli, alinkuyo njônge. Ingamu yâke âli Coy. Kangî umwêne âbûkâga ukusuluka akayila, akayila ka finyamana, kangî umwêne inogonâga, “Lilino, linga une ngutika akayila aka, une naloliloli ngugâgâga amîsi.” Kangî i fâlâsi yâke yâli fiyo yûmilwe mpaka ululimi lwâke lwêlelâga pânja, lûmîle, imbulo syâlyândwîke ngesefu nukûma nu nsânga. Umwêne âkolelile ikifûnga kyâke pamwanya pa kisyo kyâke mu mbelo gwa nsanga mpaka ikyêne kyapîyigwe môsa, kangî umwêne âpyûtîgwâga, panongwa ya mîsi. Kangî umwêne âlongolêlâga ifalasi yâke akabalilo kâko umwêne âtikîle injila. Kangî umwêne alinkuti, akabalilo kâko umwêne âfikîle pa falasi umwêne âkabwêne akayila ka finyamana aka, alinkuti, “Naloliloli akêne kisakunyêgelâga une

ku mīsi.” Popāpo umwēne ikunyēla ukwitoga pa falasi yāke nukwāndako ukusuluka pa kayila.

⁷⁸ Kangi i falasi yāmēnye yōpe iyēne yāli pa kayila ku mīsi. Mūmo Kyala ikupa amabyebye ku kinyamana ikisitakuyoba! Kangi ukusuluka ku kayila iyēne yilinkubūka. Kubumalikisyo, panāndi kyāsanwike ukusōkàpa ku lubafu lumolwēne, itolo pabunāndi fiyo ukusōka pa kayila akapamandigwe. I falasi yālōndāga ukusanukila injila yila, lōli Coy ālinogwīne mbukīndāne. Umwēne āgelile ukūmilisya iyēne mu kayila akānywāmu akapamandigwe, kangi umwēne alinkwāndako ukusuluka kangi i falasi yilinkusita kubūka. Umwēne alinkuyiniōngotola iyēne, kangi iyēne yilinkusyūmbutuka nukwāndako injila iyīngi. Kangi iyēne yilinkwānda ukwīnukila mmwanya. Umwēne āli nkatale fiyo ukungwīsyā umwēne.

⁷⁹ Popāpo umwēne alinkwānda ukukwāba ifilaso ku yēne kāngi, mpaka umwēne alinkutumula i falasi, fiyo anyenyemusigwe ukufika ku mīsi, ubūmi bwāke āngali bukupayigwa, mpaka i falasi yālīmīle, yikutetema, yikōnek’ilopa. Kangi umwene alinkuketa pasi, alinkuketa pasi pala, kangi umwene alinkutetema bo *lula* kangi kifuki ukugwa pāsi pa mwene. Umwene alinkunkēta pāsi ku mwene, kangi alinkukēta ililopa pa lubafu lwake. Umwene āli Nkristi. Kangi umwēne alinkuyoba ku falasi yāke, umwēne alinkuti, “Une akabalilo kīngi mbilike ukuti ifyandīsu... pamo, ifinyamana fyāli na mabyebye. Ikyēne kitikuboneka ngati akabugutila akanini panāndi kala kāsyumbutwike panja injila yila kābagile ukubūka ku mīsi. Ikyēne kikuboneka ngati injila inywāmu iyi apa yābagile ukulōngolela kūko abēne bikubūka kīngikīngi ku mīsi, lōli,” alinkuti, “linga ugwe umbīmīle une nubusūbiligwa mpaka na lino, une nisakukōnga amabyebye gāko.”

⁸⁰ O, mumo une ngwinogona isya ikyo isya Kristi! Injila ya ku bōnangiko yo yifumusigwe kangi yimulikigwe injila yōsa, lōli gulipo unsebe unsekele ugu gukulōngolēla ku Būmi. Banandi bisakuyangapo aba bikuyagaga Iyene. Kwene, komma amabyebye, lolu u Mbepo Mwikemo isakukubikaga ugwē palubafu ku misi gala aga Bumi. Une ngwinogona, Ikyene kindwele une nubuponesyo mpaka na lino, une ngukyegaga Ikyene injila yosa iyi yisyele.

⁸¹ Ukumalisya akapango, umwene—umwene akābukile sinda gwa maillo, mpaka, lōsa pa kamokēne, i falasi insubiligwa yila yilinkwītāga mulamula nkibwīna ikinywāmu ikya mīsi. I falasi yāmēnye iki iyēne yāyobelāga ngapo, iki iyēne yāsanusyāga mu njila yāke iya buyobelo ku u—u ntogi. Umwene alinkufika nkati mula. Umwene alinkuti umwene āsopile amisi mmwanya mu mbulo ya falasi. Umwene alinkumōsya umwene, umwene alinkulalata kangi umwene alinkuywega, kangi umwene alinkuywega pamwanya pa masyu gake, nukonelela amisi

pāsi pa mmilo gwāke, nukukūta, “Uswe tupokīgwe! Uswe tupokīgwe! Uswe tupokīgwe!” Kangi i falasi, yikunwa, kangi yikutetema. Kangi umwēne alinkukēta ku lubafu lwāke ulufulale, polelo bōsa ubwānike ukufuma kubungw’āle bwa fyākulasa.

⁸² Kangi alinkuti itolo akabalilo kala, umwene alinkuti... āpilike u munduyumo ikuyoba, “Sōka panja pa misi.” Kangi umwēne alinkukēta, kangi pala ālipo yumo ung’wālang’wāligwe untimang’ombe ĩmīle pala. Kangi umwēne alinkusōka pānja pa mīsi. Umwene alinkuti umwene ānungīsyē u moto, kangi umwene alinkukēta ukukilania, kangi pala kyalipo ikipambo kya bandu ku bugonelo kula. Abēne bāli pamwanya pala bafwēle imyēnda ya bafukula-migodi. Abēne bātīkile u golidi yumo, kangi pa nsebwe ukugomokela abēne bāli ni falasi syābo nukulūndika ifalasi mula, kangi abēne bālisile ku kibwīna kya mīsi iki kangi bātūsyāga, kangi abēne bōsa bānwile.

⁸³ Kangi alinkuti abēne bāli nako kumo ukupīya inyama ya mbabala kangi umwēne nalōli alinkulya na bēne. Kangi alinkuyoba, yumo mwa bēne, “Inwa ikyakunwa.” Umwēne alinkubabūla abēne uyū umwēne āli, umwēne āli Jack Coy, u—u kalōngolēla gwa kiMwēnye. Polelo umwene alinkuti, “Ena, lilino, inwa ikyakunwa.”

Umwene alinkuti, “Umma,” umwene alinkuti, “Une ndikunwa mma.”

⁸⁴ Kangi ikyo kyo luko lwa mahelu ku bandu bala. Polelo umwene alinkuti, “Ugwe kwegaga ukunwa ukufuma kwa uswe!”

Umwene alinkuti, “Umma, une ndikunwa mma.”

⁸⁵ Polelo umwene alinkusopa indeko mmwanya, kangi alinkuti, “Ega unnwa!” Bagele, bosa ba abene, umwe mumenye, ukufwana sinda gwa kalongo na babili.

Kangi polelo umwene alinkuti, “Ndaga ugwe, balumiana.”

⁸⁶ Balinkuti, “Linga inyama yambabala yītu nnūnu ukufwāna ukulya, ubwālwa bwītu bo bununu ukufwāna ukunwa.”

⁸⁷ Kangi umwe mumenye mumo abene bayilile, bagālīle. Kangi umwene alinkuti, “Umma,” umwene alinkuti.

⁸⁸ Kangi abene balinkusopa ikikalang’asa mu ndusu, kangi balinkuti, “Lilino ugwe kunwaga pamo ikingi!”

⁸⁹ Umwene alinkuti, “Umma. Umma, une ndisakunwa.” Kangi umwene alinkwanda ukutega indusu. Alinkuti, “Itolo pa kabalilo.” Alinkuti, “Une ngaya nulutende ukufwa mma.” Umwene alinkuti, “Une—une ngaya nulutende ukufwa mma.” Umwene alinkuti, “Loli une—une ngulonda ukukubula ugwe akapango kangu bo une ngāli ngabomba, inongwa iyi une ndikunwa mma.” Alinkuti, “Une ndi gwa ku Kentucky.”

Umwēne alinkuyoba, “Kangi mu katēmbē kanini akaiyolo akāfisinga ulubūnju lumō, kūko u māma alāmbalēle ikufwa, umwēne alinkungōlēle une ku lubafu lwa kitala, kangi alinkuti, ‘Jack, u tāta gwāko āfwīle na kabugutila ka makadi nkiboko kyāke, ukukilania i mesa, agālīle.’ Kangi alinkuti, ‘Komma ukunwamo siku, Jack, kilikyosa iki ugwe kubomba.’” Kangi alinkuti, “Pa lubafu lwa mama gwangu une ndinkwāla amaboko gangu. Kangi une nafingile kwa Kyala, ukuya ndumiana gwa fwinja-kalongo-mbukusi, une āngali ngwēgamo siku ukunwa kwangu kwakwanda.” Umwene alinkuti, “Une ngakinwamo siku ikylene.” Kangi alinkuti, “Lilino linga ugwe kulonda ukutusulila, ugwe itolo tusulila.”

⁹⁰ Kangi bo unnwa alinkufyūsyā indusu yāke nukukisopa ikikopo mmwanya kangi, alinkuti, “Ega ubwēne pamo une nisakutusulila!” Kangi itolo polēlo i ndusi yilinkutūsulila kangi ikikopo kilinkupufuka.

⁹¹ Īmile ku lubafu lwa kyāmba āli unnini ugwaiyolo untimang’ombe, ungw’ālang’wāligwe, na māsōsi gikubopa ukusuluka amasays gāke. Umwēne alinkuyoba, “Jack, une nīne ngufumila ku Kentucky. Une nātēndike u lufingo kwa māma ilisiku limo, lōli une nālyōnēnge u lufingo lwāngu.” Umwēne alinkuyoba, “Une nagūlilāga mpaka abamiāna aba bafikilepo ukugāla ukufwāna, kangi nāyaga pakugoga ikipambo kyosa ikya bēne, mulimosa, ukwega iki golidi abene bāli nayo.” Umwēne alinkuti, “Lōli une njīle ngālīle kangi une mbōmbīle ubusōbi. Lōli,” alinkuti, “Une ndinsisimikisyi akabalilo kāko indusu yāngu yālūndumāga mmwanya ukukīnda ifyāmba fya Kumwanya, u māma āpilīke une ngusīmba u lufingo lumō une ndisakubōmba ikyēne kangi mma.” Kangi pala, ukwisila mu lipyana lya Kyala, umwene alongolīle a bandu bosa bala kwa Kristi, bosa bala panja pala.

⁹² Muketile, kilipo ikindukimo ukufwana na misi, ikindukimo ikya kupūpwa. Ifundo yangu yāli, ukufika ku misi akabalilo kāko ugwe uli ni kyūmilwa. Kilipo ikindukimo ikyēne kikubōmba kwa ugwe, ko kubūkāga ku mīsi akabalilo kāko ugwe kūmilwa.

⁹³ Lilino, Umwēne alinkuti, “U lutēngāno Lwāngu Une ngululeka na umwe. Lwāngu ulutēngano Une ngupa umwe.” Komma bo ikisu kikubapa umwe ulutengano, loli injila iyi Umwene ikubapa umwe lutengano. Ulutēngāno Lwāke lukusimisyā ikyūmilwa kyītu. Linga uswe tukunyōnywa u lutēngāno, polelo unko uswe tupūpwe mu lutēngāno Lwāke, ukumanya ukuti uswe tuli nu lutēngano na Kyala ukwīsila mwa Ntwa gwītu Yeso Kristi. Umwēne yo mupi-gwa-Lutēngāno gwītu uyū ukusimisyā ikyūmilwa kyītu.

⁹⁴ Ilināndi ili likuyoba Umwēne yo Kyākulya nalōli kangi Kyākūnwa nalōli. Une ndinako akanini akang’wāle apa, ilinandi

lya 57, “Kyākùlya nalòli kangi Kyākùnwa nalòli.” Pilikisya iki Umwene àyobíle apa.

Kangi mūmo Tāta gwābūmi āndumíle une, kangi Une ndi mūmi ukwísila mwa Tāta Gwāngu: momūmo umwēne yūyo ikulya une, yōpe isakuyaga mūmi ukwísila mwa une.

⁹⁵ Mmasyu agangi, “U Tāta ālindumíle Une, kangi Une ndi mūmi ukwísila mwa Mwene. Kangi u nnyambala aligwesa uyu ikwísa kwa Kristi ikufimbilisigwa ukuya nu bumi na Kristi.” O, mwe, mwāketa umwe lèlo, ugo go mugonesyo. Ugo go mugonesyo gwānalòli ugu ugwe kugwāga akabalilo kāko ugwe kuya mūmi ukwísila mwa Kristi.

⁹⁶ Lilino, imibili gytu gikulondigwa ifyakulya nukunwa ilisiku lililyosa, ukuya mūmi, umbili gwitu umpalamasigwe. Linga uswe tutikwega ifyakulya i lisiku lililyosa nukunwa, polelo u mbili gwitu gukuya monywa. Kilipo ikindukimo mwa uswe ukuti uswe tukufimbilisigwa ukuya nako i kyakulya. Ikyakulya kya lisiku limo kitisakuyapo mpaka ilisiku ilikōnge. Ugwe kufimbilisigwa ukuya ni kyākùlya ilisiku lililyōsa, ukukasya ubūndu bwāko ubwakufwa. Ugwe ubagile ukwitugasya ukukilania, loli ugwe uli monywa. Kangi ilisiku lya kibili, ugwe ukāli uli monywa. Kangi ilisiku lyakitatu, ugwe kufika ukuya nalòli mōnywa.

⁹⁷ Ena, ikyo kyo iki akabalilo kīngi ukuti uswe tukubomba mbulagili bwamwambepo. Umwe muketile, ilisiku lililyōsa uswe tukufimbilisigwa ukuyobesania na Kristi. Uswe tukufimbilisigwa ukuyoba ku Mwēne ilisiku lililyōsa. Uswe tukufimbilisigwa ukusayana ikyēne nu Mwēne ilisiku lililyōsa. Pauli àyobíle, “Une ngufwa ilisiku lililyōsa.” Muketile? “Ilisiku lililyosa, une ngufwa; lōli une ndi mūmi, komma une lōli Kristi mūmi mwa une.” Polelo, linga umbili gwako umpalamasigwe gukulondigwa kyakulya ilisiku lililyosa nukunwa ilisiku lililyosa, ukuya mūmi, umbili gwako ugwāmwāmbèpo gukulondigwa i Kyakulya ikyamwambepo nu mugonesyo nu Ntwa ilisiku lililyosa, ukuya nu bumi. Ena. Yeso aatile, “Umundu atisakuya nu bumi nu nkati gwene umma, lōli ni Lisyu lililyosa ili likufuma pa kanwa ka Kyala.” Popāpo, ilisiku lililyōsa uswe tukufimbilisigwa ukufunda i Bāngéli. Abāndu bamo batikufūnda Ilyēne napanandi. Bāmo bakulipimba Ilyēne kabili pamo katatu kōsa i kyīnja. Loli, umwitiki ugwabwanaloli, ugwanaloliloli uyu naloliloli ayengigwe, umwene ikubala ili Bāngeli lyake ilisiku lililyosa, kangi ikuyoba kwa Ntwa. Uko ko kutalusya. [Ubuyo busitakandu pa tepi—Nsimbi.] Umwene ikufimbilisigwa ukubomba. “Umundu atisakuya nu bumi nu nkati gwene, loli ni Lisyu lililyosa ili likufuma pa kanwa ka Kyala.”

⁹⁸ Lilino, ikĩndu ikĩngi uswe tukulĩla ikyākũlya, ko kuyēnga u mbili ukulwāna ni mbũngo. Linga ugwe utikulya ifyakulya, kangi ukwitikisya umbili gwako ukuya monywa, polelo ugwe go gwĩlāmbike ku mbungo. Imbungo yisakukonyokaga mulamula nkisoko kya lilopa, kangi apa ugwe ukĩndile. Linga ililopa lyāko likaya likabi kangi lipelelesye, mulimosa, polelo ilyēne lisakubūkāga, imbungo yisa kubũka mulamula mu lusōko lwa lilopa lyāko. Popāpo ugwe kufĩmbilisigwa ukulya ikyākũlya ikinunu ikyākuswila ukukyũnga ulusōko lwa lilopa lwāko luyege kanunu. Linga ugwe utikubōmba, ugwe gwe gwākwāmbũla ku mbungo syōsa. Ikyo kyo iki kitamisye na baKristi bingi.

⁹⁹ Ngati ifibyāligwa mu nyũmba ya nāsale. Umwe mumēnye, ugwe kwēga ikimela panja pa nyũmba ya nāsale, ugwe kufĩmbilisigwa ukukipepeka ikyēne. Ikyēne kikamanya akabalilo. Ikyēne kikamanya ulumu ni fĩndu, ikyēne kifumile pakukupililigwa pamwanya nu kupākisigwa. Kāngi ikyo kyo iki kyo lutamio na bĩngi fĩyo aba-bikukōlēgwa Bakristi, abēne bo fimela fya nyũmba ya nāsāle. Uko ko kutalusya, ukwĩlāmbika ku kanyamana kalikōsa aka kakwĩsamo mula! Umwe mumenye, ikyēne kyo itolo i—i . . . Ikyēne kyo itolo i—i kimela ikyōnywa iki kikufĩmbilisigwa ukunyāfiligwa, pamo, i fimela fya haibridi.

¹⁰⁰ Umwe mumenye, ugwe kwēga iyaiyolo i ng'ombe ya Hereford nukumwābulila umwēne panja pala pa ndēka, nukumwābulila u ntali-mbembe panja pala, u ntali-mbembe yula abagile ukutēndēka injila yāke mwēne panongwa yakuti umwēne yo kimesya ikyapabwāndilo. Lōli ugwe kwēga u Brangus pamo i Hereford iyo yo kimesania kangi i haibridi, iyēne yo ng'ombe innunupo ukukēta namāso, nalōli, ndupanopo kangi ngafupo, lōli ugwe kagila isyēne panja pala, isyēne sikabagila ukutēndēka i njila yābo. Isyēne sisakufwa! Isyēne sikufĩmbilisigwa ukuya mbubisigwe. Muketile?

¹⁰¹ Kangi ikyo kyo iki kyo lutamio umwĩsyũgu, uswe tuli nabo aBakristi abafwāle-kanunupo, ifipānga ifinywāmpo, kangi bwingi bwa—bwa ubumanyili, bwingi bwa bufundakyala, loli abene bikufĩmbilisigwa ukuya bapubisigwe akabalilo kosa, ugwe kufĩmbilisigwa ukukēta ukwĩsila mu māndalasi gābo pamo ugwe utikukēta napanandi mma. Iki uswe tukulondigwa kyo Bakristi bamesigwa-mbupelelesye, bapāpigwe paasi pa Lilopa lya Ntwa Yeso, uyu mūmi komma ukufuma ku bufundakyala, lōli ukufuma ku Lisyu lya Kyala, u mugonesyo na Kristi. I Lisyu likwisa mwa mwitiki, umbili gwake—gwake ugwamwambepo gubũmbĩgwe. Komma u mwāna gwa nyumba ya nāsāle!

¹⁰² Alipo u ndumbilili yumo āyobile umwisyugu, une nālimpilike umwene, umwene āyobile ikyo pa bufumusye, umwene alinkuti, ukuti akabalilo kako umwene ikwisa nkisu, umwene āli nu lutamio ulukulumba lwa kipungo

ikyabwilabwila, kangi abene bāyobaga isya bupanje. Kangi abene balinkuyoba ukuti abene bayaga pakubomba *iki* na *kila*, nu kukēka pa mwēne nu kupānja, nu kusōsyāpo ikiyabo kimo kya mbakasya ya mumbulo, iki kyābagile ukwīngisya ikisyo kyāke nkati, na fyosa bo ifyo. Kangi umwēne ālinkuyoba umwēne ānwīle amapilisi ukwīsula i ndobo. Kikuboneka ngati gālipo amapilisi mīngi fiyo aga umwēne āfimbilisigwaga ukunwa. Loli akabalilo kako umwene ikwisa ku ngānga unnunu u gwaKikristi, u ngānga āyobile, “Unko uswe twībwe amapilisi kangi unko uswe twībwe u kupānja, kangi unko uswe tuyēnge mōsa u mbili ukuti ugwēne gubagile ukulwāna ni kipūngo.” Ikyo kyo kyēne!

¹⁰³ Ngimba kitamisye fiki abāndu batikuya nu būmi akabalilo katali bo mūmo abēne bālisibile? Uswe tukufimbilisigwa ukwēga i sindāno kuli *iki* kangi i sindāno kuli *kila*, nukwipūtila twībēne ukukilania nu luko lōsa lwa mikota. Ngimba ikyēne kikubōmba fiki? Ikyēne kikutufikisya uswe ukuya batōfu, batupano, bayegeyele, basita bununu. Akabalilo kāko u nnyāmba gwa mbutali ubu bukīndilepo. . . Fiki, uswe twe bakwāmbūla ku kilikyōsa. Lilino abēne bikwāmbula ifyakwambula-kwāmbula na filifyōsa ifingi.

¹⁰⁴ Une nīmilemo mu Africa, nātōligwe ukulāsiga ni sindāno kuli i sekema ya mbwēle. Lōli imbwēle ya sekema yābagile ukwītōga pa kiboko kyāngu, une nguyaga ni sekema ya mbwēle. Isyēne sitikuywēga, kangi ugwe utikumanya mma kifuki. Isyēne sikwitoga, isyēne itolo sikwītōga pamwanya, ikyo kyo ikyēne, ugwe uli nayo iyēne. Linga ugwe kuya mūmi, ugwe kwisakuya ni yēne ku fyīnja kalongo-na-fihano. Kangi polelo utubalilo tumo ugwe kufwa ni yēne. Kangi pala bālipo bala abenekīsu mu tutēmbē twābo utunini, ni mbwēle mōsa ukukilania mmalūndi gābo, abēne bali ngelebune. Imbwēle sikwibanīlila pa bēne, imbwēle sya sekema, kangi ikyēne kikābatamiaga abēne. Fiki? Abēne bāyēngile mōsa ubwīponesyo. Abēne bāli ni sindāno imbīgwe-na-Kyala.

¹⁰⁵ Kangi ikyo kyo iki kitamisye umwisyugu na bandu. Ikyo kyo iki kitamisye ni kipanga. Uswe tuli ni sindāno nyīngi fīyo isyabupubisye kangi ubufundakyala ubutendekīgwa-numūndu, mpaka uswe tupūtiligwe mōsa. Iki uswe tukufūmbwa yo sindāno ya Kyala ukwisila mu Lisyu lwa Ntwa Kyala. Mundu isakuya mūmi ilisiku lyōsa nu luko lwa Kyākulya ukuyēnga umoyo gwāke ukubuka mu sindāno ukufuma ku mbungo syamwambēpo isi sikwēndelēla nukunyēla ukusyūngutila i kīsu. Ndinakyo ikilūndiko lwa tusīmbe pa iki, lōli une nguyaga pakufimbilisigwa u kwīma.

¹⁰⁶ Lilino, yēnga mōsa, yaga gwakwītēndekesya kuli i sindāno. Lilino, uswe tukuya būmi pa iki, igyītu—igyītu imibili gikufimbilisigwa ukuya na iki. Kangi, linga uswe tutikubōmba

polelo uswe tukulāmbikigwa ku luko lōsa ulwa mbungo. Kangi i Lisyu lya Kyala, bo uswe tukwitika Ilyene nukulitikisya Ilyene ukwisila mugonesyo, “Ntwa, i Lisyu Lyako lyo Bwanaloli.”

¹⁰⁷ “Ikipanga kyangu kikuyoba ugwe utikufimbilisigwa ukupapigwa kangi. Abene bikuti, ‘Ukuponania amaboko ko kupāpigwa kangi.’ Abene bikuyoba, ‘Kunyafila.’ Abene bikuyoba ifindu fyosa ifi, ‘Ikyo kyo kyene, Tāta, Mwanundumiana kangi Mbepo Mwikemo.’” Lōli i Bāngéli lyāyobile ukōsigwa mu Ngamu ya Yeso Kristi. Muketile? Lilino, umwe kīndililāga ni sindāno inyātigwe sila linga umwe mukulōnda, ugwe kwipelaga gwimwene ukuya Nkristi umwātigwe. Muketile? Ugwe utikulonda ikyo.

¹⁰⁸ Ugwe ukabagila ukuya nu Bumi, kwene ukwisila mwa Kristi. Kangi lilino ngimba i Lisyu Lyake likubomba fiki? Ilyene likuyenga u mbili gwitu, gwamaka, mumo uswe tukuyobesania nu Mwene, ukulwana nu mōhèsi.

¹⁰⁹ Ugwe kuyoba, “Nkundwe Branham, ngimba ikyo kyo fiki ugwe kuyoba, ‘ukuyobesania mu Lisyu Lyāke?’”

¹¹⁰ Ena, Umwene yo Lisyu. “Ku bwandilo lyalipo i Lisyu, kangi i Lisyu lyāli na Kyala, kangi i Lisyu lyāli Kyala. Kangi i Lisyu lyapeliigwe ukuya mbili kangi nukwitugasya pakati pitu.” Kangi uswe tubagile ukulya u mbili Gwake. Polelo u mbili Gwake go Lisyu Lyake, panongwa yakuti Umwene yo Lisyu. Kangi Umwene alinkuti, mwa Mwikemo Yohani 15, “Linga ugwe kwitugasya mwa Une, kangi u mugonesyo Gwangu, i Lisyu Lyangu, likwitugasya mwa ugwe, polelo ugwe ubagile ukusuma iki ugwe gwīganile kangi ikylene kisakubombeligwaga kwa ugwe.” Mwaketa lelo umwe. Ikyo kyo kyabwanaloli. Muketile, suma iki ugwe kulonda!

¹¹¹ Ngimba ugwe kubombaga fiki? Ugwe kuyenga u mbili gwako ku sindāno ukufuma ku... Umunduyumo ikwisamo kangi alinkuti, “O, ikipanga kyitu kitikwitika mukalata.” Muketile, ugwe kuyēnga mōsa. Fiki? Ugwe uli nu mugonesyo mwa ugwe, i Lisyu. Kangi ugwe uli ni sindāno ukufuma ku kyene. Linga ikipambo kya butoyofu kikwisa nkati, ngimba ikylene kyo fiki? Ilyene likaya nalyo i Lisyu mu lyēne, polelo ugwe usisimikiisye ikylene kyo kisobi. Une ndikupasya mumo ikylene kikubonekela kyabwanaloli, linga ikylene kikaya Lisyu kileka kyene ikylene. Kutalusya, kileka kyene ikylene. Une ndikupasya iki ikylene kikubomba, ikylene kikufimbilisigwa ukufwanikisania ni Lisyu!

¹¹² Mu lwīpūto, bo une ngwāndīsyā Mikaya imile pala, kēta, ikylene kyābonekāga naloliloli palapala, akabalilo kāko pala ālipo Israeli, kangi akayabo kala ka kīsu kyāli kya bēne. Abahēsya bala bālīngilēmō nkati nukwēga ikylene ukupoka abēne kangi bāyēngile inyūmba syābo bēne, kangi abēne bālyēgile ikiyabo kya kīsu iki Kyala abapēle abēne. Polelo ikylene kyabonekaga ngati bala abasololi bamia bana ba kiHiburi

bāli batalusye. Loli, umwe mumenye, kyalipo kimo ukufwana na Yehosafati aali gwamwambepo, umwene alinkuti, “Ngimba ugwe ukaya nayo uyungi?”

¹¹³ Alinkuti, “Une ndinayo uyungi, lōli,” alinkuti, “Une numbengile umwēne. Ikindu kyene iki umwēne ikusolola kyo kibibi.”

Alinkuti, “Buka ukammwege umwene kangi unko uswe tumpilike umwene.”

¹¹⁴ Kangi umwene alinkubuka pamwanya, umwene alinkuti, “Kindililāga, kindililāga mwanya pala, loli une numbwene Israeli ababalanisigwe ukuya bo ng’osi sikaya nu ntimi.” Kangi polelo umwene alinkubabula imboniboni yake.

¹¹⁵ Lilino, kyaywāni kyo kitalusye? Ikyēne kyābonekaga ngati abamia bana bala bāli batalusye. Abanyāmbāla bamia bana abamanyisigwe kanunu, bikuyoba, “Buka kula, u Ntwa ali na ugwe.” Kangi yōpe Zedekiya āli ni—ni—ni—āli ni . . . Zedekiya āli ni mbēmbē sibili inywāmu isyakisulu siyēngigwe. Umwene alinkuti, “Ukwisila mu iki ugwe kwisakuguta abahesya panja pa kisu.” Umwene aali nsimikisye umwene aali ntalusye. Umwene aamenye umwene aali ntalusye. Loli, umwe muketile, umwene aali nsobi.

¹¹⁶ Kangi apa, Mikaya, yumo ukulwana na bamia bana, kangi umwene alinkuti, “Linga ugwe kufyuka, Israeli isakubalanilaga, kisita ntimi nayumo.”

¹¹⁷ Kangi abangi bātīle, “Buka kula, u Ntwa ali na ugwe!” Lilino, mufyakupalamasigwa, abēne bāli batalusye, ubuyo bula nalōli bwāli bwa Israeli. Loli i Lisyu lya Ntwa lyālintobisye Ahabu, polelo bulebutle Kyala asaye iki Umwene ātōbisye?

¹¹⁸ Pala icyēne kili umwīsyūgu. Muketile? I Lisyu lya mugonesyo lyāli mwa Mikaya. Lilino, linga ugwe kuyobesania na Kyala mu kwegu umugonesyo ugwanalolili, kangi imbepo mwa ugwe yikulwana ni Lisyu ili, ugwe utikuyobesania na Kyala, ugwe kuyobesania ni misyētāno. Kangi igyēne gyo fīyo gyākwēgelēla! Ili Bangeli lyāyobile, “Mmasiku ga bumalikisyo abene kifuki ukusyōba a Basaligwa linga syāli syakubombigwa. Loli kumwanya na pasi fisakumalikaga, loli i Lisyu Lyangu litisakumalikamo.” Kangi linga i . . . Pauli āyobīle, Galatiya 1:8, “Linga ugwandumi ukufuma kumwanya ikulumbilila inongwainunu yiliyosa ukukinda Iyi umwe mutalile mwapilike, ndeke umwene agunigwege.” Yōpe u gwāndūmi! Mu kipanga icyāpakwānda, akabalilo kāko abanyāmbāla bala, bo yu Mwikemo Martin, Ireneo, abanyāmbāla abanyakyala, akabalilo kako u mōhēsi ābonekaga bo gwandumi gwa lumuli. Loli, umwe ketesya, umwene ikuyaga panandi itolo pānja pa Lisyu.

¹¹⁹ Umwēne ābonīke kwa Eva ukuya gwāndūmi gwa bwēlu, ālimbūlīle umwēne, “Naloli, u Ntwa āyobīle *iki*, u Ntwa

āyobīle *iki*,” lōli umwēne ikukanikana na Kyala kulakula ku bumalikiyo. Kangi iyo yo njila umugonesyo unyōbi gukubōmbēla umwīsyūgu. Akabalilo kako abandu bikwinogona abene bikwiputa kwa Kyala, kangi batisa kupilikila i Lisyu, ugwene go mugonesyo ugwabutungulu.

¹²⁰ “Linga ugwe kwitugasya mwa Une, kangi i Lisyu Lyangu mwa ugwe, polelo suma aka ugwe gwiganile,” muketile, “kangi ikyene kisakubombigwaga.” Lilino, ikyēne itolo kikabagila ukubūka akabalilo kamokēne, polelo ukusōka akabalilo akakōnge. “Umwe itūgala mwa Une, Masyu Gāngu mwa umwe,” ikyo kyo, syāla pala. *Itūgala* kokuti uku “tūsyā pala, syāla palapala pala.” Ena, iyēne—iyēne yo sindāno ukufuma ku mbūngo sya butulwanongwa.

¹²¹ Lilino, unko une nīgala ukuyoba ilisyu limolyene ili lilino, bo tukāli uswe ukubūka ku mēsa ya mugonesyo. I Lilopa nu Mbili gwa Ntwa, gufuluganikene nu lwitiko, ilyo lyo Lilopa nu Mbili, uyo yo Mbepo ni Lisyu, fitikimbuligwe nu lwitiko, fikufwāna nu Bumi Bwasyēpwa. “Umwēne uyu ikulya u Mbili Gwāngu kangi ikunwa i Lilopa Lyāngu ali nabo u Būmi Bwasyēpwa, kangi Une nisakunysyāga umwēne mmwanya ku lisiku lwabumalikiyo.” Mwaketa lelo umwe. Ngimba ikyene kyo fiki? Unngonelo bwa Ntwa. I Lisyu nu Mbepo, u Būmi ubu buli mu Lilopa, i Lisyu kangi u Mbepo fikufwāna nu Būmi Bwasyēpwa, ukwisila mu lwītiko mwa Ntwa.

¹²² Apa lulipo u lwīpūto lwāngu, bo une ngukēta u bumalikiyo bukusegelēla nukukēta, ku miniti yilyiōsa, ikindukimo kyābagīle ukuboneka, nukumanya ukuti uswe tukaya kubutali fiyo ukufuma ku Kwisa kwa Ntwa:

Ntwa, polelo mu Ngamu ya Ntwa Yeso, u Mwanundumiana gwa Kyala, unko une nege i Lisyu, u Lūbo, nukuyugānia Ilyēne nu lwītiko ulu une ndinalo, nukutumula injila yāngu ukukīndamo mu maka galigōsa ga misyētāno, mpaka une ngūmbōna Yeso, ukwisila mu kuyobesania kwa Lisyu Lyāke.

¹²³ Angalaga ni Lisyu Lyāke. “Linga ugwe kwitugasya mwa Une, kangi i Lisyu Lyangu mwa ugwe, polelo nsuma Une iki ugwe gwiganile kangi ikyene kisakubombeligwaga kwa ugwe.” Bumogi buki! Bulipo ubulilanisi ubwanaloliloli ni Lisyu kangi u Mbepo, nu lwitiko ukuyugāsya Ikyene palikimo, “Suma iki ugwe kulonda, kangi ikyene kisakubombeligwaga kwa ugwe.” Unko uswe twipute.

¹²⁴ Gwaipyana kangi Gwapagwīmwenē Mwikemo Tāta Kyala, unkulumba Une YONE, u El Shaddai, kwa Abraham. O Kyala, mūmo ugu u mugonesyo unkulumba gwa Ntwa gukufwāna nu Būmi Bwasyēpwa, kangi mūmo Ikyēne kikulas’isindāno ukufuma ku lwītūfyo, mūmo Ikyēne kikulas’isindāno ukufuma ku busitakwītika, mūmo Ikyēne kikulas’isindāno ukufuma ku butulwanongwa bwa kisu! Ugwene go mugonesyo, nu lugano

Lwakyala kwa Tāta gwitu Gwakumwanya. Kangi ukwisila mu bugolofu bwa Yeso Kristi uswe tulinako ukufikila ku mēsa iyi. Kangi uswe tukusuma, Ntwa, ukuti Ugwe kutupaga aligwēsa gwa uswe ukufikila kula ikilo iki, mwa Mbepo. Tuswaga uswe. Kangi uswe tukulōnda imibili gyītu gyām wāmbēpo ukukūla. Uswe tutikupāsa isya kwīngila ikipānga kimo pamo ikipāngakipāgūke. Uswe tukulōnda ukuyēnda umbili gwām wāmbēpo, ku bulasigw'isindāno bwa butulwanongwa, ku buyo kūko pala pakayapo kangi mma ikinyonywo ukubōmba ubusobi, kangi kūko u Mbepo Mwikemo abagīle ukwega i Lisyu Lyake Mwene ni milomo gyitu, nukuyoba Ikyene itolo ukuya kipya mūmo Ikyene kyāyobīgwe pa lisiku lila, panongwa yakuti Ikyene yo Mbepo yulayula uyu aali mwa Ntwa Yeso. Une ngusuma, Tāta, ukuti Ugwe kutupaga ikyo kwa uswe.

¹²⁵ Isala sikwīgala. Itolo akabalilo kāko, uswe tukamanya, ukuti yula ugwabumalikisyo isakupokigwa. Loli une ngwiputa ikilo iki, Ntwa, linga balipo abo apa aba bakakumanya Ugwe ukuya Mpoki gwabo, abēne balikwāgāga Ugwe ukuya ikilo iki bo abēne bikwīsa ku mīsi ga lōsyo, ukuya kikūmbūsyō, ukulāta ku mbili ugu gwa bītiki ukuti abēne bikwītika akapāngo ukuti Yeso gwa Nazareti āpapīgwe ukufuma ku mfunde Maria, kangi āgogīgwe, ukōmelīgwa na Pontius Pilati, kangi āfyusīgwe mmwanya i lisiku lyabutatu na Kyala, kangi itugesye ku kiboko ikililo ikya Lwimiko Lwake, ikilo iki, bwīla ukuya mūmi ukutēndēka ubwīmīla-pakati.

¹²⁶ Tupaga, Ntwa, ukuti umundu yulayula yula, ikupilikila ingomelesyo sya i Bāngèli, “Pinduka, aligwesa gwa umwe, kangi yaga mōsigwe mu Ngamu ya Yeso Kristi ku busyūle bwa mbībi syīnu. Kabuno yikayapo i ngamu iyingi pāsī pa Kumwanya yipēgīgwe pakati pa bāndu kūko umwe mubagile ukupokigwa.” O Kyala, abandu balikētaga ubwanaloli-ndumbula bwa ikylene, kangi Ilisyu ilyanololi, “Yikayapo nayimo ingamu iyingi pasi pa Kumwanya yipēgīgwe pakati pa mūndu kūko umwe mubagile ukupokigwa, loli mu Ngamu ya Yeso Kristi.” Polelo, u ntumigwa alinkuti, “Pinduka, aligwesa gwa umwe nukosigwa mu Ngamu ya Yeso Kristi kubufyule bwa butulwanongwa, kangi ugwe kwisa kwambililaga ikyabupi kya Mbepo Mwikemo. Kabuno ulufingo luli ku ngulilo yiliyoya, na bu bwingi mumo Untwa Kyala gwitu isakukoolēla.” Tupaga, Ntwa, ukuti kwisakuyangako ukukōlēla kwingi ikilo iki.

¹²⁷ Kangi isyene siyobigwe kāngi, nu Ntwa gwitu, “Nayumo umundu abagile ukwisa ku Myangu penepapo Tata Gwangu ikunkwaba umwene, kangi bosa aba Tata ambele Une bisakwisaga kwa Une. Ing'osi Syangu sikupilika a Masyu Gangu.” U hhesya, kangi linga nhesya ikuyoba, a masyu aga gakaya gamasimbo, mbibimbibi ing'osi yisakukyāgania ikyēne. O Kyala! Kangi linga ilyene lyo Lisyu Lyako, ili Bangeli, iki Ilyene likuyoba, ing'osi yiliyosa yisakupilika Ilyene, panongwa

yakuti Ilyene lyo Kyakulya kya ng’osi. Abēne balīlanilēne. Abēne bamēnye lo luko luki ulwa Kyākulya u Tāta ikuswīla. “Umundu atisakuya nu bumi nu nkati gwene, loli ni Lisyu lililyosa ili likufuma pa kanwa ka Kyala.” Tupaga, Ntwa, ukuti bīngi bisakukēta kangī bisakupilikisya, kangī bisakwīsa kwa Ugwe ikilo iki.

¹²⁸ Bala abasita Mbepo Mwikemo, abene balingakibikaga ikyene pa sala iyingi. Ukwene kubagile ukuya kwīlile fiyo mu sala iyingi. Abene lumo batisa kuya kuno mma.

¹²⁹ Kangi, Tāta, mūmo uswe twībūngénie ukusyūngutūla i mesa lilino ukwēga ubwimilīli ubu ubwa mbili Gwāko untumulīgwe, uswe tukusuma ukuti linga pabagile ukuyapo ubutulwanongwa nkati mmyitu, Ntwa, tuswaga uswe. Ugwe gwatile, “Akabalilo kako umwe mukwisa palikimo, gūlila yumo kuli unnine.” Kyala, linga bulipo ubutulwanongwa mu kilundilo iki, paliposa, une ngusuma ukuti i Lilopa lya Yeso Kristi likupāgūlania u nnyāmbāla yula ukufuma ku butulwanongwa bwāke, pamo unkīkūlu yula, ndumiana pamo ndindwana. Kangi, Tāta, une ngwīputūla nīmwenē, ukuti Ugwe kwīsa kupāgūlania une ukufuma ku kwīlāmwa kulikōsa, ubutulwanongwa bulibōsa, ukusitakwitika bulibōsa, kalikosa aka . . . Uswe tumenye ukuti ubusitalwitiko bo butulwanongwa. Ubwene bo butulwanongwa bwene ubu buliko. “Umwēne uyu ikwītika mma yo atalile atobesigwe.” Kangi ubutulwanōngwa bwēne ubu buliko, ko kusita kwītika i Lisyu lya Kyala. Kangi, Tāta, linga kulipo ukusitakwitika mwa une, hobokela une, O Kyala, ubu bo buliko bwīngi, kangī une ngusuma ukuti Ugwe kunhobokelaga une. Hobokela ikilundilo kyangu iki Ugwe umbele une ikilo iki, nukubalyesya abene pa Lisyu. Tupaga ikyene.

¹³⁰ Kangi bo uswe tukwēga ifi ifinīni ifikūmbusyo fya mbili umbongotolīgwe gwa Umwēne Yūyo asyusīgwe ukufuma ku bafwe kangī mūmi kwa bwilanabwila pakati pitu, tuli ambulilaga uswe ubulilanisi ukufuma ku Mwene, Ntwa, ukulīlanila kwa Mbepo Mwikemo. Tupaga ikyene, Tata. Uswe tukusuma mu Ngamu ya Yeso. Ameni.

¹³¹ Lilino, kwa umwe mukufimbilisigwa ukubūka kangī mukabagila ukusyāla kuli ububōmbēlo bwa mugonesyo gwa maminiti-kalongo-na-mahano . . . Bakayapo bīngi ba uswe, kangī uswe tukwegaga u mugonesyo. Ugwēne gukaya mugonesyo umwīgalilano. Ugwēne go lōsa kuli aligwēsa u mwītiki Gwakikristi. Kyala akaya nu nkolofwa pakati pa Baptisti na Methodisti, na fyosa bo ifyo. Uswe twesa, nu Mbepo yumoywene, bōsigwe mu Mbili gumogwene, kangī uswe twe bandu bīnītu ba Kitangalala kya Kyala. Kangi linga alipo yumo pakati pa uswe uyu nhesya, une ngaya apa fiyo mma, kangī ngamanya uyu yo mwenekaya kangī uyu akaya mma. Kumbukilaga, kali kyo kipanganki iki ugwe kubukako,

ikyoye kikaya nakyo nakimo ikyakubombapo ni kyene. Kilipo i Kipanga kimokyene, mulimosa, kangi ugwe utikwingila mu Kyene, ugwe kupapigwa mu Kyene. Uko ko kutalusya. Kangi ugwe upāpīgwe mu Kipanga iki kya Kyala. Kangi uswe tukusuma ukuti ugwe kwisa kwambililaga Kristi ikilo iki, ukuyobesania nu Mwene bo uswe tukukumbukila u mbili Gwake umbongotoke, kangi utumbakasya utu utunini tūto uswe tukwēga, utwa pāsa, kangi Kyala alinyāfilāga indumbula syītu na mabyēbye ni Lilopa.

¹³² Lilino abēne bisakutwālāga umugonesyo, kangi uswe twisakubala lilino ukufuma ku Bakorinti Bakwanda, untu gwa 12. Kangi uswe tukwegaga u mugonesyo mbibimbibi ukufuma pa iki, kangi uswe tukusūbīla ukuti Kyala isakukusaya ugwe mbwingi. Polelo akabalilo kako uswe tukubala iki, pamo itolo bo tukāli uswe ukubala ikyene, linga ugwe kufimbilisigwa ukubūka, ena, ugwe ubagīle ukusōka mbupepe. Kangi polelo yaga na uswe kangi ikilo kya Kitatu, kangi ulubunju lwa Ndungu kangi pa Ndungu nkilo. Linga ugwe ubagīle ukusyāla ukulya mugonelo na uswe, uswe twisakuya basangalufu fiyo kuli ugwe ukubōmba ikyēne. Polelo mbibimbibi ukufuma apo, kwisakuyaga u Ntwa . . . kwisakuyaga ububōmbēlo bwa lōsyo, ulu lwisakuyaga mu kifuki maminiti kalongo-na-mahano, pamo malongo mabili ku bwīngi ukusitakukīnda, une ngusakikisya. Bakorinti Bakwanda, untu gwa 11, ilinandi lya 23.

. . . Une nāmbilile ifya Ntwa ifi une nīne ngutwāla kwa umwe, Ukuti u Ntwa Yeso ikilo kilakila . . . iki umwene āpēfyīgwe ālyēgīle u nkati:

Kangi akabalilo kāko umwēne ābōmbile āpēle imbālisyo, umwēne alikubongotola ugwēne, . . . alinkuti, Ega, kangi ilya: ugu go mbili gwāngu, ugi go gubongotolīgwe kuli umwe: iki bōmba mu lukūmbusyo lwa une.

Kangi ukufuma nkabōmbelo kalakala kāngi umwēne alinkwēga ikikopo, kangi akabalilo kāko umwēne ālīle, ikuyoba, Iki kyo kikopo kya lwitikano ulupya mu lilopa lyangu: iki bōmba umwe, kingikingi mumo umwe mukunwa ikyene, m'bukumbukilo bwa une.

Kabuno bo kingikingi mumo ugwe kulya unkati ugu, nukunwa ikikopo iki, ugwe nalōli kunāngisya panja u bufwe bwa Ntwa mpaka umwene ikwisa.

Fyōbēne aligwesa uyu atisa kulya iki . . . aligwesa uyu ikulyaga u nkati ugu, nukunwa ikikopo iki ikya Ntwa, mbusitakufikapo, isakuya ntobesigwe gwa mbili ni lilopa lya Ntwa.

Lōli unko u mūndu ikētēsye mwēne, kangi popāpo unko umwēne alye ifya u nkati, kangi ukunwa ifya i kikopo.

Namanga umwēne uyu ikulya nu kunwa kisitakufikapo, ikulya kangi ikunwa ikigune ku mwēne, kisita kukmanyila-ngāni u mbili gwa Ntwa.

Fyōbène pa nōngwa iyi bīngi bo babine kangi bōnywa pakati pa umwe, . . . bīngi bakugona.

Kabuno linga uswe tubagile ukwīlonga twibene, uswe tukabagila ukulongigwa.

Lōli akabalilo kāko uswe tulōngigwe, uswe tukufūndigwa nu Ntwa, ukuti uswe tulingalōngigwàga ni kīsu.

Fyōbène, bakundwe bāngu, akabalilo kāko umwe mukwīsa palikimo ukulya, gūlilānaga yumo kuli u nnīne.

¹³³ Lilino, akabalilo kanandi itolo aka lwiputo kwa aligwesa gwa uswe, nyīputīla une akabalilo kāko une ngwīputīla umwe. [Nkundwe Branham ikwīputa nubutofu—Nsimbi.] . . . ? . . .

Paga isūme isi, Mwenemaka Kyala. Swaga uswe isya ngilanio syītu bo uswe tukuswa bala bābo bikutōnangila uswe. Iki uswe tukusuma mu Ngamu ya Yeso Kristi. Ameni.


¹³⁴ Utōmbo utunīni utu utu to nkati gwa koshala tutēndekigwe ukufuma ku nyēmba, na fyōsa bo ifyo, iki kikwīmilīla u mbili gwa Ntwa. Ugwēne gukaya gwākusyūngutīla mma, ugwēne gubongotoligwe ntupatu tōsa. Ikyēne kyo panongwa yakuti ikyēne kikusanusya umbili Gwāke umbongotoligwe ugu gwābongotoligwe kuli uswe. Kangi Kyala alipaga isayo Syake kwa aligwesa uyu ikulya ikyene. Lilino, ugwēne gukaya mbili mma, ugwēne gukwīmilīla u mbili. Une ngaya na maka, nakimo ikingi kikubōmba, ukutēndēka ikyēne ukuya kalikōsa lōli unkati. Kyala mwēne. Kangi ikyo kyo iki Umwēne ātubūlīle uswe, ukulya unkati ugu nukunwa ikikopo iki ikya bwālwa. Lilino unko uswe twinamisye imitu gyitu.

¹³⁵ Unkīnde Mwīkemo Kyala, Yūyo ababōmbi yo uswe, mu Ngamu ya Yeso Kristi, kēmēsya unkati ugu kuli ububōmbelo bwāke ubulōndigwe, ukutupela uswe, mumo uswe tukwambilila ikyene, kumbukilaga ukuti Untwa gwitu akomeleligwe; kangi umbili Gwāke, umpala kangi umwīkemo bo mūmo ugwēne gwāli, gwālyōnganikēne ni fulale ni mīfya ni misumali, kuli uswe, ukuti ukwīsila mu mbili Gwāke undāsuligwe mwāsōkilēmo pānja u Mbepo uyu ikupa uswe u Būmi Bwāsypway. Tuli uswe, Ntwa, bo uswe tukulya iki, tuyege nu lipyāna lya pānjila, bo mūmo Israeli ābōmbile ifyīnja malongo mana ndulāngalānga, kangi kisita u mōnywa yumo pakati pa bēne. Tāta Kyala, paga iki, bo uswe tukusuma Ugwe kemesya unkati ugu, nkati gwa kosha, panongwa ya bubōmbélambombo bwāke. Mu Ngamu ya Yeso. Ameni.

¹³⁶ Ikikopo kya Lwĩtikáno Ulupya, i Lilopa. une ngwinogona isya lwimbo lula:

Ukufuma pala nu lwĩtiko une nalubwēne u
 lusōko lula
 Ifilonda Fyako ifisululuke fikupa,
 Ulugano ulutabule lwāli fundo yāngu,
 Kangi lwikuyaga mpaka une ngufwa.

¹³⁷ Akabalilo kāko une ngukēta ililopa ili, imipesa, ililopa lya mipesa, Une mmenye ilyēne likwĩmila i Lilopa ili lyālisile pānja ukufuma mu mbili gwa Ntwa Yeso. Aligwēsa yūyo ikwāmbilila iki aliyāga nu Būmi Bwāsyēpwa, ububine bulisōkāngamo pānja pa mibili gyābo, ngusūma ubukatale nu bōnywa, ikipahu, u mōhēsi (mu luko lōsa) alisōkangamo mu bēne, ukuti abēne babagile ukuya na maka nu bukafu ubukulumba na Būmi Bwāsyēpwa, ukuleka ubwēlu bwābo ukumulika pankyēne pa ngulilo imbibi kangi yabulogwe iyi uswe tukwītūgalāmo, ukuntūfyā Kyala.

¹³⁸ Tāta Gwakumwanya, uswe tukutwala kwa Ugwe ikipaso kya mpesa. Mu Ngamu ya Yeso Kristi, kēmesya icyēne, ukwĩmilila i Lilopa lya Mwanundumiana Gwāko, Yeso, mu Lyēne uswe tuli na, “Afulasigwe panongwa ya ngilano syitu, ni fulale Syake uswe twagāngwike.” Tupaga, Ntwa, ukuti u Bumi bwisakwisaga kwa uswe, u Bumi bwa Syepwa mu bwisusye ubukulumba, ukuti uswe tubagile ukumbombela Ugwe kanunupo, ukuya na maka nu bukafu ukutupimba uswe ukufuma pa buyo ukubuka ku buyo kūko uswe tukugūlila Ugwe, kulikosa Ugwe kutukōléla uswe. Tupaga isayo isi, mu Ngamu ya Yeso, uswe tukusuma. Amen. 

MUGONÈSYO KYA62-0204
(Communion)

Ubulumbilili ubu butwaligwe nu Nkundwe William Marriion Branham, ubu pakwanda bwatwaligwe nki Ngereza pa Ndungu namayolo, Februari 4, 1962, ku Branham Tabernacle mu Jeffersonville, Indiana, U.S.A., bwegigwe pa busimbe bwa tepi ya magneto kangi busimbigwe kisitakutumula mu ki Ngereza. Ukusimba ukwa mu Kyangonde ubu bwasanusigwe nu kuyabanisigwa na ba Voice of God Recordings.

KYANGONDE

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org